

# ዒዘራ ማፃአፖ ዓይያ ካሮ

ዒዘራ ማፃአፖ ጾኑሲ ዓሶ ሃይሶ ኬኤዛ ላምዖ ማፃአፖንህ ሄሌያ ማዓዖ፣ ኬኤዛ ሃይሳ ዳውሲንቲ ዴንዲ ዓኣ ዓይሁዶ ዓሶኮ ዛላ ዓሲ ባብሎኔ ዓጫፓ ማዔህና ዩሩሳላሜይዳ ዓሲኮ ናንጊናፓ ጾኑሲ ካኣሽከህንታ ዛላ ጊንህ ዓካሶናያ ማዔህኬ፤ ዩይ ሃይሳ ፓቁንቴህ ሃካፓ ዴማ ዓኣ ጎይያኬ፡-

1. ባብሎኔይዳ ዳውሲንቲ ዴንዲ ዓኣ ዓይሁዶ ዓሶፓ ካኣቲ ቁኢሮሴ ዓይህም ቤርታዲ ማዔ ዓሶ

2. ጌኤዡ ማኣሮ ጊንህ ዓካሲ ማዶ ዓርቆናህና ጾኑሲ ካኣሽኪያ ዩሩሳላሜይዳ ዓርቆናህ

3. ሚርጌ ለዔኮ ጊንፃፓ ጾኑሲኮ ዋጎ ዔራ፣ ዒዘራ ዓይሁዶ ዓሶ ዩሩሳላሜ ዔኪ ሙኬህ፤ ዩይ ዒዘራ ዒሲራዔኤሌ ዓሳ ጾኑሲም ማዶ ማዶ ቤርታኣሲጉዲ ማሃኒና ዴራ ፔኤኮ ፔቱሞና ናንጋ ናንጎዋ ጊንህ ደዲሻንዳጉዲ ማኣዴኔ።

## ማፃአፔላ ዲማ ዲማ ዓርቆ ባኮ

ዲዒንታፓ ቤርታሲ ማዔ ዓሶ (1:1—2:70)

ጌኤዡ ማኣሮ ዓካሶናህንታ ማዶማኣ ጊኢጊሻናህ (3:1—6:22)

ዒዘራና ዋላ ዲዒንታፓ ማዔ ዓሶ (7:1—10:44)

ዓይሁዶ ዓሳ ፔ ዓጮ ማዓንዳጉዲ ቁኢሮሴ ዓይህህ

1 ናንጊና ናንጋ ጎዳ ፔ ማሊያ ኬኤዛ ዔርሚያሴ ዛሎና ቤርታ ኬኤዜ ሎንሆ ቃኣሎ ፓርሴ ዓህ ቁኢሮሴ ካኣታዳ ቤርታሳ ሌዖና ጌይንቴህጉዲ ማዶ ኩንህኔ፤ ዋዎይይ ጌዔቴ፡- ናንጊና ናንጋ ጎዳ ቁኢሮሴ ፔኤሮ ዔቁሲ ሃካፓ ዴማ ዓኣ ዓይህያ ፃኣፒሲ ዓጮ ቢያይዳ ናባቢሴኔ።

2 ፓርሴ ካኣቲ ፃኣፒ ዓይህ ባካ፡- «ናንጊና ናንጋ ጎዳ ማዔ ጫሪንጮኮ ጾኩህህ ዓጮ ቢያ ታኣኒ ዋይህንዳጉዲ ማህኔ፤ ዒዚ ፔ ካኣሽኪንታንዳ ጌኤሽ ማኣሪ ዪሁዳ ዓጮኮ ዩሩሳላሜይዳ ታኣኒ ማዡንዳጉዲ ታና ዓይህኔ።

3 ዓካሪ ዒንህ ባኣካፓ ናንጊና ናንጋ ጎዳ ዴሬ ማዔ ዓሲ ጉቤ ጾኑሲ ዒዛና ዋላ ማዖንጎ! ዪሁዳይዳ ዓኣ ዩሩሳላሜ ዴንዲፓ ዒኢካ

1:1 ዓ.ር. 25:11፤ 29:10። 1:2 ዓ.ሲ. 44:28።

ናንጋ የኦሳዊዎ፡ ናንገና ናንጋ ጎዳ ማዕ ዒሰራዔኤሌ የኦሳዊዎ ጌኤሺ ማኣሪ ማዦንጎ፡፡

4 የኦሲ ዳርታዎ ዳውሲንቲ ዳንዲ ዓኣዞንሢ ፔ ዓጮ ማዓ ዎዶና ዔያቶና ዎላ ናንጌ ዓሳ ቢራንታ ዎርቄንታ ዓይጎ ማሄታቶዎ ጫኣና ጫኣና ቆልሞዎ ማዎም ዒንገ ማኣዶንጎ፤ ዩይ ባካ ዩሩሳላሜይዳ ዓኣ ጌኤዦ ማኣሮም ፔ ሸኔና ዔያታ ዒንጋሢዳ ቃሲሢ ማዎንጎ» ጋዒያኬ፡፡

5 ዩካፓ ዪሁዳና ቢኢኒያሜና ፃጳኮ ሱኡጎንታ ቄኤሶንታ ሌዊ ዓሶንታ፤ ዩያጉዲ ሃሃ የኦሲ ዔቄሴ ሜሌ ዓሲ ቢያ ማዒ ዳንዲና ዩሩሳላሜይዳ ዓኣ ናንገና ናንጋ ጎዳኮ ጌኤዦ ማኣሮ ገንሣ ዓካሲ ማዦኒ ገኢገንቲ፡፡

6 ዔያቶኮ ዓሺና ቢራ ዓንገና ዎርቄናይዳፓ ኮሺንቲ ማሄ፡ ጋላም ማዓንዳ ሚኢሸንታ ዔኤቢ ጫኣናንዳ ቆልሞንታ ሜሌ ኮይሳያ ማዕ ዒንገንታ ባኣዚና ጌኤዦ ማኣሮይዳ ዒንገሢ ማዒ ሺኢካ ባኣዚ ቢያ ዒንገ ዔያቶ ማኣዳ፡፡

7 ዩያ ሌሊቱዎንቲ ሚና ቤርታ ካኣቲ ናብካዳናያኦሬ ዩሩሳላሜይዳ ዓኣ ጌኤዦ ማኣሮፓ ቡሪ ዔኪ ፔኤኮ ካኣሽኮ የኦዞ ማኣራ ጌሣ ዑዦ ዑሽኮ ዓንጎንታ ጌኤዦ ማኣሮ ማሆዎ ማሃ ቄኢሮሴ ዔያቶም ዒንጌ፡፡

8 ዩንሢ ዲማዴ ጌኤዦ ማኣሮ ማሆንሢ ማትሬዳቲ ጌይንታ ጌኤዦ ማኣሮ ማሆ ጌሃ ኬኤፆኮ ሱኡጋሢና ፓይዲሲ ዪሁዳ ዓጮ ዎይሃ ሸሽባፃሬም ቄኢሮሴ ዒንጌ፤

9-10 ዩያ ማሆኮ ፓይዳ ሃካፓ ዳማ ዓኣ ጎይፆኬ፡-

- ዒንጎ ባኮ ዔኮያ ማዓንዳ ዎርቄፓ ኮሺንቲ ሳኣኔ ሃይሢታሚ
- ዒንጎ ባኮ ዔኮያ ማዓንዳ ቢራ ዓንገዳፓ ኮሺንቲ ሳኣኔ ፔቲ ሺያ
- ዲማ ዲማ ዓፓሮ ላማታሚ ታዙጳ
- ዎርቄይዳፓ ኮሺንቲ ዔቲ ሳኣኔ ሃይሢታሚ
- ቢራ ዓንገዳፓ ኮሺንቲ ዔቲ ሳኣኔ ዎይዶ ጄኤታና ታጳ
- ሜሌ ሃሃ ዲማ ዲማ ማሄ ፔቲ ሺያ

11 ሸሽባፃሬ ሃንጎ ዲዒንታፓ ማዕ ዓሶና ዎላ ባብሎኔፓ ዩሩሳላሜ ማዕ ዎዶና ዔኪ ሙኬ ቢሮ ዓንጎና ዎርቄናይዳፓ ኮሺንቲ ማሆንታ ሜሌ ማሆኮዎ ሚርጉማ ዶንጎ ሺያና ዎይዶ ጄኤታናኬ፡፡

## 2

ዲዒንቶይዳፓ ፔ ዓጮ ማዕ ዒሰራዔኤሌ ዓሶ (ኔሄ. 7:4-73)

1 ባብሎኔ ካአቲ ናብካዳናጾኦሪ ዲዒ ዔኪ ባብሎኔ ዓኣዳ  
ዓሰይዳ፣ ፔኤኮ ካታሞ ካታሞ፣ ዩሩሳላሚና ዪሁዳና ማዒ ሙኩኔ  
ዓሰኮ ፓይዳ ያዲኩ፡-

2 ዩያቶ ዲዒንታፓ ማዔ ዓሰኮ ሱኡጎ ማዒ ዔኪ ሙኩኔ ዓሳ  
ዜሬባቡሌ፣ ዒያሱ፣ ኔሄሚያ፣ ሴራያ፣ ሬዔላያ፣ ማርዳኪዮሴ፣  
ቢልሻኔ፣ ሚሰፓሬ፣ ቢግዋዬ፣ ሬሁሚንታ ቤዓና ጌይንታዘንሢኤ።  
ፔቴ ፔቴ ዒሰራዔኤሌ ዓሰ ቶኦካፓ ቡኪንቲ ዓጮ ባንሢ ማዔ ዓሰኮ  
ፓይዳ ሃካፓ ዳማ ዓኣ ጎይጾኩ፡-

3-20 ፓርዮሼ ፃጳፓ ላምዮ ሺያና ጃኤታና ላንካይታሚ ላምዮ ዓሲ  
ሺፓዲያ ፃጳፓ ሃይሃ ጃኤታና ላንካይታሚ ላምዮ ዓሲ  
ዓራሄ ፃጳፓ ላንካይ ጃኤታና ላንካይታሚ ደንጎ ዓሲ  
ፓሃትሞዓኣቤ ፃጳፓ ዒያሱና ዒዮዓቤና ዜርፃፓ ላምዮ ሺያና ሳሊ  
ጃኤታና ታጳ ላምዮ ዓሲ

ዔላአሚ ፃጳፓ ፔቴ ሺያና ላምዮ ጃኤታና ደንጊታሚ ያይዶ ዓሲ  
ዛቲ ፃጳፓ ታዘጳ ጃኤታና ያይዲታሚ ደንጎ ዓሲ  
ዛካዬ ፃጳፓ ላንካይ ጃኤታና ላሂታሚ ዓሲ  
ባሂ ፃጳፓ ላሆ ጃኤታና ያይዲታሚ ላምዮ ዓሲ  
ቤባዬ ፃጳፓ ላሆ ጃኤታና ላማታሚ ሃይሃ ዓሲ  
ዓዝጋኣዴ ፃጳፓ ሺያና ላምዮ ጃኤታና ላማታሚ ላምዮ ዓሲ  
ዓዶኒቃሜ ፃጳፓ ላሆ ጃኤታና ላሂታሚ ላሆ ዓሲ  
ቢግዋዬ ፃጳፓ ላምዮ ሺያና ደንጊታሚ ላሆ ዓሲ  
ዓዲኔ ፃጳፓ ያይዶ ጃኤታና ደንጊታሚ ያይዶ ዓሲ  
ሂዚቁያሴ ዛሎና ዓፄሬ ፃጳፓ ታዘጲታሚ ሳሊ ዓሲ  
ቤፃዬ ፃጳፓ ሃይሃ ጃኤታና ላማታሚ ሃይሃ ዓሲ  
ዮራ ፃጳፓ ጃኤታና ታጳ ላምዮ ዓሲ  
ሃሹሚ ፃጳፓ ላምዮ ጃኤታና ላማታሚ ሃይሃ ዓሲ  
ገባሬ ፃጳፓ ታዘጲታሚ ደንጎ ዓሲ

21-35 ዩያ ዲዒንታፓ ማዔ ዓሰ ባኣካፓ ዲማና ዔያቶኮ ቤርታኣ  
ዓዶንሢ ሃካፓ ዳማ ዓኣ ካታሞይዳ ናንጌ ዓሰኮ ፓይዳ ያዲኩ፡-  
ቤኤቴሌሄሜይዳ ሾይንቴ ዓሳ ጃኤታና ላማታሚ ሃይሃ  
ኔጾፓይዳ ሾይንቴ ዓሳ ደንጊታሚ ላሆ  
ዓናቶቴይዳ ሾይንቴ ዓሳ ጃኤታና ላማታሚ ሳሊ  
ዓዝማዌቴይዳ ሾይንቴ ዓሳ ያይዲታሚ ላምዮ  
ቁርያትይዳሪሜ፣ ኬፕራና ቤዔሮቴናይዳ ሾይንቴ ዓሳ ላንካይ  
ጃኤታና ያይዲታሚ ሃይሃ  
ራማና ጌባዔናይዳ ሾይንቴ ዓሳ ላሆ ጃኤታና ላማታሚ ፔቴ

ሚክማሴይዳ ሾይንቴ ዓሳ ጭታና ለማታሚ ለምዎ  
ቤኤቴኤሌና ዓይናይዳ ሾይንቴ ዓሳ ለምዎ ጭታና ለማታሚ  
ሃይሃ

ኔቦይዳ ሾይንቴ ዓሳ ደንጊታሚ ለምዎ

ማግቢሼይዳ ሾይንቴ ዓሳ ጭታና ደንጊታሚ ለሆ

ባሳ ዔላአሜይዳ ሾይንቴ ዓሳ ፔቴ ሺያና ለምዎ ጭታና  
ደንጊታሚ ያይዶ

ሃሪሜይዳ ሾይንቴ ዓሳ ሃይሃ ጭታና ለማታሚ

ሎዴ፣ ሃዲዴና ያናይዳ ሾይንቴ ዓሳ ለንካይ ጭታና ለማታሚ  
ደንጎ

ዒያርኮይዳ ሾይንቴ ዓሳ ሃይሃ ጭታና ያይዲታሚ ደንጎ

ሴናይዳ ሾይንቴ ዓሳ ሃይሃ ሺያና ለሆ ጭታና ሃይሢታሚ

36-39 ሃካፓ ዴማ ሃሃ ዲዒንታፓ ማዔ ቁኤሶ ማኣሮ ዓሶ ፓይዶ

ከኤዛኔ፡-

ዒያሱ ዜርፃሢ፣ ዩዳዒያ ማኣሮ ዓሶፓ ታዘጳ ጭታና ለንካይታሚ  
ሃይሃ

ዒሚሬ ማኣሮ ዓሶፓ ፔቴ ሺያና ደንጊታሚ ለምዎ

ፓሽሁሬ ማኣሮ ዓሶፓ ፔቴ ሺያና ለምዎ ጭታና ያይዲታሚ  
ለንካይ

ሃሪሜ ማኣሮ ዓሶፓ ፔቴ ሺያና ታጳ ለንካይ ዓሲ

40-42 ዲዒንቶ ቤዛፓ ማዔ ሌዊ ማኣሮ ዓሶኮ ፓይዳ ሃካፓ ዴማ

ዓኣ ጎይዖኬ፡-

ሆዳውያ ዜርዖ ማዔ ዒያሱንታ ቃድሚዔሌንታ ማኣሮ ዓሳ  
ለንካይታሚ ያይዶ

ዓሳኣፔ ዜርዖ ማዔ፣ ጌኤዡ ማኣሮይዳ ያኣሲ ቦንቾ ዓይኑሞ  
ዓይናዳ ዓሶኮ ሚርጉማ ፔቴ ጭታና ለማታሚ ሳሊ

ጌኤዡ ማኣሮ ካፓ ሻሉሜ፣ ዓዴሬ፣ ፃልሞኔ፣

ዓቁቤ፣ ሃዲፃንታ ሾባዬ ዜርፃፓ ፔቴ ጭታና ሃይሢታሚ ታዘጳ

43-54 ዲዒንታፓ ማዔ፣ ጌኤዡ ማኣሮ ማደሞ ኬሶና ቶኦካ ሃካፓ

ዴማ ዓኣ ዓሶኬ፡-

ዲሃ፣ ሃሱፓ፣ ፃባዖቴ፣

ቁርሴ፣ ሲዓሃ፣ ፓዶኔ፣

ሌባና፣ ሃጋባ፣ ዓቁቤ፣

ሃጋባ፣ ሻሞላዬ፣ ሃናኔ፣

ጊዴሌ፣ ጋሃሬ፣ ሬዓያ፣

ሬዲኔ፣ ኔቆዳ፣ ጋዛሜ፣

ዑዛ፣ ፓሴሄ፣ ቤሳዬ፣

ዓሲና፡ ሜዑኒሜ፡ ኔፕሲሜ፡  
 ባቅቡቄ፡ ሃቁፓ፡ ሃርሁሬ፡  
 ባዲሉቱ፡ ሜሂዳ፡ ሃርሻ፡  
 ባርቆሴ፡ ሲሳራ፡ ቱማሄ፡  
 ኔዲሃና ሃዲፓናኩ።

55-57 ሴሎሞንም ማዳ ዓሶ ፃጶታዎ ዲዲንታፓ ማዕ ቶኦካ፡-  
 ሶፃዬ፡ ሃሶፔሬቱ፡ ፔሩዳ፡  
 ያዕላ፡ ዳርቆኔ፡ ጌዴሌ፡  
 ቬፓዲያ፡ ሃዲሌ፡ ፖኩሬቱ፡  
 ሃዲባይሜና ዓሚ ጌይንታዞንሢኩ።

58 ጌኤዡ ማኣር ማደም ኬሶና ፃጶና ሴሎሞንም ማዳ ዓሶ ዜርፃ ዋሊ ዑፃ ሃይሃ ዌኤታና ታዞጲታሚ ላምዎ ዓሲኩ።

59-60 ቱልሜላሄ፡ ቱልሃርሻ፡ ኬሩቤ፡ ዓዳኔና ዓሚሬ ጌይንታ  
 ካታሞንሢዳፓ ማዒ ሙኩ ዓሲ ዓኣኔ፤ ጋዓንቲ ዔያቶኮ ዜርፃ  
 ዒሰራዔኤሌ ቶኦካፓ ማዒ ፕዚሲ ኬኤዛኒ ዔያታ ዳንዳዒባኣሴ።  
 ሜሌ ሃሣ ዳላያንታ ያቢያንታ ኔቆዳ ፃጶ ቶኦካፓ ማዒ ሙኩ ላሆ  
 ዌኤታና ደንጊታሚ ላምዎ ዓሲያኣ ዓኣኔ፤

61-62 ሃካፓ ዳማ ቁኤሶ ፃጶ ማዕዞንሢ ሃባያ፡ ሃቆፃና ባርዚላዬና  
 ዔያቶኮ ቤርታኣ ዓደንሢ ዎናንሢታቲያ ዔርቲባኣሢር ዔያታ ቁኤሴ  
 ማዒ ማዳኒ ዳንዳዒባኣሴ። [ባርዚላዬ ጎሥሢ ጌሌዓዴይዳ ሾይንቲ  
 ባርዚላዬ ፃጶፓ ፔቲ ላኣሊ ዔካዎ ዬኖ ሱንዎና ዔኤሊንቲ።]

63 ዑሪሚና ቱሚሜ ጎዎ ባኮንሢና ናንጊና ናንጋ ጎዳ ዓይጎ ጋዓቲያ  
 ያኦጫኒ ዳንዳዒ ቁኤሴ ኬሰካንዳያ ሄላንዳኣና ያኦሲም ሺኢሺንታ  
 ዲማዳ ሙዎ ዔያታ ሙዑዋጉዲ ዓጮ ዎይሣ ዓሢ ዔያቶ ላኣኔ።

64-67 ዓካሪ ዬያ ጎይዎና ዲዲንታፓ ማዕ ዓሶኮ ሚርጉማ ዋሊ ዑፃ  
 ያይዲታሚ ላምዎ ሺያና ሃይሃ ዌኤታና ላሂታሚናኩ።

ዬያ ዓሶፓ ማዳ ማዳ ዓቲንቆና ላኣሎናኮ ሚርጉማ ላንካይ ሺያና  
 ሃይሃ ዌኤታና ሃይሢታሚ ላንካይ ማዕዛ፡ ዓቲንቆና ላኣሎና ማዒ  
 ያኦሲ ቦንቸም ዓይኩም ዓይናዳ ዓሳ ዋሊ ዑፃ ላምዎ ዌኤታኩ።

ዬያ ዲዲንታፓ ማዕ ዓሶኮ፡- ላንካይ ዌኤታና ሃይሢታሚ ላሆ  
 ፓራ፡ ላምዎ ዌኤታና ያይዲታሚ ደንጎ ባቁሎ፡ ያይዶ ዌኤታና  
 ሃይሢታሚ ደንጎ ጋኣሎንታ ላሆ ሺያና ላንካይ ዌኤታና ላማታሚ  
 ሃራንታ ዓኣኔ።

68 ዬና ዲዲንቲ ዓሳ ዲዲንታፓ ማዒ ዬሩሳላሚይዳ ናንጊና ናንጋ  
 ጎዳኮ ጌኤዡ ማኣራ ዓኣ ቤዞ ሄላዛ ፔቲ ፔቲ ማኣር ዓሶኮ ሱኡጋ

---

2:63 ፓይ. ማፃ 29:12-38።

ጌኤዠ ማኣራ ቤርታ ዓኣ ቤዛ ማዓንዳጉዲ ላሚ ገንሣ ማዠፎም ማዓንዳያ ፔ ሸኔና ዒንጎ ባኣዚ ዔኪ ሸኢሸኔ።

69 ዔያታ ጌኤዠ ማኣሮ ማዶ ማዶንዶ ባኣዚ ዳንዳዓ ጎይያና ኬሲ ቡኩሴ ዒንገያ ዋሊ ዑፃ ማሆዛ ዳንጎ ጃኤታ ኪሎ ዋርቄ፥ ላምዖ ሸያና ላንካይ ጃኤታና ሳሊታሚ ላሆ ኪሎ ቢራ ማዔኔ፤ ቄኤሶም ማዓያ ጃኤታ ማኣዖ ዔያታ ዒንገኔ።

70 ቄኤሶንታ ለዊ ዓሶንታ ዳርይዳፓኣ ፔቴ ፔቴ ዓሳ ዩሩሳላሚና ኮይሎናይዳ ዳንኪ ዳዔኔ፤ ገንሣ ሃሣ ዓይኑም ዓይናዳ ዓሳ፥ ጌኤዠ ማኣሮ ካፓ ዓሶንታ ጌኤዠ ማኣሮ ሹጮና ማዠፎንዳጉዲ ጌይንቴ ማዶ ዓሶንታ ኮይላ ኮይላ ዓኣ ካታማ ዳዔኔ፤ ዩያጉዲ ሃንጎ ዒሰራዔኤሌ ዓሳ ዔያቶኮ ቤርታኣ ዓዳንሣ ናንጌ ካታማ ዳዔኔ።

### 3

#### ያኦሲ ካኣሸኪያ ዳምባ ገንሣ ዓርቂንቴሣ

1 ላንካሳ ዓገኖና ዒሰራዔኤሌ ዳራ ጉቤ ፔኤኮ ዳዓኒ ዓርቂ ካታማ ካታማ ገኢገንቴ ዳዔሰካፓ ቢያሣ ዩሩሳላሚይዳ ቡኪንቴኔ፤

2 ዓማና ዒዮጃዳቄ ናኣዚ ዒያሱ ዒዛኮ ዒገኖ ማዔ ቄኤሶንታ ሳላተያሌ ናኣዚ ዜሬባቡሌያ ፔኤኮ ዓገኖና ዋላ ናንገና ናንጋ ጎዳ ማዔ ዒሰራዔኤሌ ያኣዛሣም ዒንጎ ባኮ ሸኢሸ ቤዛ ገንሣ ኮሸኔ፤ ያኦሲ ዓሣ ሙሴ ዔርዜ ዋጎ ማፃኣፖይዳ ፃኣፒንቴ ዳምቦ ጎይያ ዒኢካ ዒንጎ ባኮ ሸኢሸ ቤዛ ዑፃ ሚቺ ዒንጎ ዒንገያ ዔያታ ዒንጋኒ ዳንዳዔኔ።

3 ዩና ዲዒንቶ ቤዛፓ ማዔ ዓሳ ዒማና ዒኢካ ዓጫ ናንጋ ማሌ ዳራ ዔያቶ ማኪ ዒፃያ ማዔሣሮ ዒገጩያታቴያ ያኦሲም ዒንጎ ባኮ ሸኢሸ ቤዛ ቤርታ ኮሾና ቤዛ ማሂ ገንሣ ኮሸኔ፤ ዩካፓ ሚቺ ዒንጎ ዒንገያ ጉቴና ዒባኒና ቢያ ኬላ ገንሣ ሸኢሸሣ ዓርቂኔ።

4 ዋጋ ዓይሣሣ ጎይያ ዉልሾ ዳማ ዳዒ ቦንቾ ቦንቾዋ ዔያታ ቦንቹኔ፤ ሃሣ ኬላ ኬላ ዒንገንታንዳጉዲ ማሊንቴ ዒንገያዋ ሸኢሸኔ፤

5 ቃሲ ሃሣ ቢያ ኬላ ኬላ ጉቤና ሚቺንቴ ዒንገንታ ዒንገያ፥ ዓገኖ ጃኤሮ ቦንቾንታ ጎዳም ዲማዴ ማሌ ቦንቾ ኬሎንታም ዒንገንታ ዒንገያና ዓሳ ፔ ሸኔና ዒንጎ ዒንገያ ማሌ ዒንጎ ባኮና ዋላ ሸኢሸኔ።

---

2:70 1ያኦሲ. ዓሃኬ 9:2፤ ኔሂ. 11:3። 3:2 ኬሲ. ማፃ 27:1። 3:3 ፓይ. ማፃ 28:1-8። 3:4 ፓይ. ማፃ 29:12-38። 3:5 ፓይ. ማፃ 28:11—29:39።

6 ዲማና ደራ ሃጊ ጌኤዥ ማኣሮ ሹጮና ማዥ ዓርቁባኣቴያ ላንካባ ባጊና ጃኤሬ ቤርታባ ከሎና ናንጊና ናንጋ ጎዳም ሚቺ ዲንጎ ዲንጊያ ዲንጊሢ ዓርቄኔ።

**ጌኤዥ ማኣሮ ሹጮና ማዥያ ጊንሣ ዓርቆናሢ**

7 ዬያጉዲ ሃሣ ደራ ሹጮና ማኣሮ ማዥ ዓሰና ሚያና ማዥ ዓሰናም ጨጎ ሚኢሾ ዲንጌኔ፤ ለባሎኦሴ ዓጫፓ ዴኤሎ ዚቢቆ ተቁ ዲዮጵ ባዘ ዓጮና ጌይሲ ዔያቶም ዳካንዳጉዲ ዓርሴና ሲዶና ካታማ ናንጋ ዓሰም ሙኡዚንታ ዑሺንታ ሪሚታፓ ኮሾ ዛይቶዋ ዳከኔ፤ ዬይ ቢያ ማዲንቲሢ ፓርሴ ካኣቲ ዓርሴ ዔያቶ ዓይሢ ጎይያናከ።

8 ዬያሮ ዬሩሳላሚይዳ ያኦሲኮ ጌኤዥ ማኣራ ማዥንቲ ዓኣ ቤዘ ዔያታ ሄሌ ላምዓሳ ሌያኮ ላምዓሳ ባጊናና ማዶ ዔያታ ዓርቄኔ፤ ዔያቶና ዋላ ዲዲንቶይዳፓ ማዲ ዬሩሳላሚ ሙከ ዜሬባቡሌንታ ዲያሱንታ ማሌ ሃሣ ዔያቶኮ ዓጮ ናኣቶንታ ቁኤሶንታ ሌዊ ዓሰንታ ቢያ ዔያቶና ዋላ ማዶኔ። ሌዓ ላማታሚና ዬካፓ ዑሣ ማዔ ሌዊ ዓሳ ቢያ ጌኤዥ ማኣሮ ሹጮና ማዥ ማዶኮ ሱኡጌ ማዲ ጌሢንቲኔ።

9 ዲማና ሌዊ ዓሢ ዲያሱንታ ዲዛኮ ዓቲንቆ ናኣቶንታ፤ ዬያጉዲ ሃሣ ዲዛኮ ዲጊሮ ማዔ ቃድሚዔኤሌና ሆዳውያና ማኣሮ ዓሰ ዛላፓ ማዔ ዓቲንቆ ናኣታ ቢያ ፔቱሞና ጌኤዥ ማኣሮ ጊንሣ ማዥሶኮ ሱኡጌ ማዔኔ፤ ሄናዳዴ ዜርያ ማዔ ሌዊ ዓሳኣ ዔያቶ ዲማና ማኣዳኔ።

10 ሹጮና ማኣሮ ማዥ ዓሳ ጌኤዥ ማኣሮ ማዥያ ዓርቃኣና ቁኤሳ ፔኤኮ ማዶ ማኣዓሢ ማይንቲ፣ ሃሣ ኩጮይዳ ዛዬ ዔኬም ዓሳኣፔ ማኣሮ ዓሰ ማዔ ሌዊ ዓሳ ዑኡቱቡሎ ዓርቁ ዋሊ ቤቁ ዔቄኔ፤ ዔያታ ካኣቲ ዳውቱ ዋዳፓ ማዲንቲ ማዲንቲ ሙከ ዳምቦ ጎይያ ዓይኦምና ሂዚ ጌዒ ናንጊና ናንጋ ጎዳ ጋላቲኔ፡-

11 «ናንጊና ናንጋ ጎዳ ኮሺከ፤

ዲሰራዔኤሌ ዓሰ ዲ ናሽካ ናሹማ ናንጊና ናንጋያከ።»

ዬያ ዋሊ ዓኣሢ ዓኣሢ ዔያታ ያኦሲ ቦንቾም ዓይናዴኔ፤ ጌኤዥ ማኣሮ ሹጮና ማዥያ ዓርቁንቲሢ ፔቲ ፔቲ ዓሳ ዑኡዞ ዴጊዲ ዲላሺ ዲላሺሢና ናንጊና ናንጋ ጎዳ ጋላታኔ።

12 ጋርቾ ቁኤሶና ሌዊ ዓሰናፓ ሚርጌሢ፤ ዬያጉዲ ሃሣ ቶኣኮ ቶኣኮኮ ሱኡጋ ቤርታኣ ጌኤዥ ማኣሮኮ ማዥንቶ ፔ ዓኣፖና ዛጌሢሮ ሃሢ ማዥንታ ጌኤዥ ማኣሮኮ ማዥያ ዓርቁንታሢ ዛጋያ ዑኡዞ ፔኤኮ

3:10 1ያኦሲ. ዓሃኬ 25:1። 3:11 1ያኦሲ. ዓሃኬ 16:34፤ 2ያኦሲ. ዓሃኬ 5:13፤ ዓይኦ. 100:5፤ 106:1፤ 118:1፤ 136:1፤ ዔር. 33:11።

ዳጊዲ ዩኤኬኔ፤ ዒማና ዒኢካ ዓኣ ዛሎ ዓሳ ጋዓንቴ ዒላሺሣ  
ዓርቄ።

13 ዔያታ ዒላታ ዳጌ ዑኡዛ ሃኬ ዋይዚንታሣር ዋዞ ዒላሺያና  
ዩኤፖ ዑኡዞና ያኦኒያ ዲማሲ ዔራኒ ዲንዳዒባኣሴ።

### 4

#### ጌኤዦ ማኣራ ጊንሣ ማዢንቱዋጉዲ ዒዲ ማደና ማደ

1 ዪሁዳና ቢኢኒያሜና ዴሮኮ ሞርካ ዲዒንቶፓ ማዔ ዓሳ ናንጊና  
ናንጋ ጎዳ ማዔ ዒሰራዔኤሌ ያኦዛሣ ጌኤሺ ማኣሪ ማዢሣ  
ዋይዜኔ።

2 ዬያሮ ዔያታ ዜሬባቡሌና ቶኦኮ ቶኦኮኮ ሱኡጎ ኮይላ ሙካዎ፡-  
«ጌኤዦ ማኣሮ ኑ ዋላ ማዢም፤ ሃያ ዒንሣ ካኣሽካ ያኦዛሣ  
ኑዋ ካኣሽካ፤ ዓሶኦሪ ካኣቲ፣ ዓሰራዶኔ ሃንጋ ዓጮ ባንሣ ኑና  
ዳኬሣዳፓ ዓርቃዎ ዒዛም ዒንጎ ባኮ ኑ ዒንጊ ዒንጊኬ» ጌዔኔ።

3 ጋዓንቴ ዒማና ዜሬባቡሌንታ ዒያሱንታ ቶኦኮ ቶኦኮኮ ሱኡጋኣ  
ቢያ ዬንሣ ዓሶም፡- «ናንጊና ናንጋ ጎዳ ማዔ ኑ ያኦዛሣ ኑ ማዢ  
ጌኤዦ ማኣሮ ማደ ዒንሣ ኑና ማኣዳንዳያ ኮይሱዋሴ፤ ዬያ ፓርሴ  
ካኣቲ፣ ቁኢሮሴ ኑና ዓይሣ ጎይያና ኑ ኑኡሮ ማዢንዳኔ» ጌይ ማሄኔ።

4 ዬካፓ ዬዮ ዓጮይዳናንጋ ዴራ ዓይሁዳ ዓሶ ዒጊቸሣና ሃሣ ካራ  
ባይዚሣና ጌኤዦ ማኣሮ ማዢያ ማደ ላኣጋኒ ዔቄ።

5 ዔያታ ዋዋዳይ ጌዔቴ፡- ፓርሴ ካኣቲኮ ቢታንታ ዓኣ ዓሶም  
ዴማና ዒንጎ ሚኢሺ ዒንጊሣና ማኣሮ ማዢም ላኣጋኒ ማሌኔ፤  
ዬያ ዔያታ ካኣቲ ቁኢሮሴ ዋዳፓ ዴንዲ ካኣቲ ዳኣሪዮሴ ዋዶ  
ሄላንዳኣና ማዲያ ሃሺባኣሴ።

#### ዩሩሳላሜ ጊንሣ ማዢንቱዋጉዲ ዒዲ ማደና ማደ

6 ዬያ ሌሊቱዋንቴ ዔያታ ካኣቲ ዪሬቢሲሴ ካኣታዳ ቤርታሳ  
ሌዎይዳ ዪሁዳና ዩሩሳላሜናይዳ ናንጋ ዲዒንታፓ ማዔ ዓሳ ዋጌና  
ዓርቄንታንዳጉዲ ሃይሶ ፃኣፒ ካኣቲም ሺኢሺኔ።

7 ዓርፄክሲሴ ፓሪሴ ዓጮ ካኣቲ ማዒ ዓኣ ዋዶና ቢሸላሜ፡  
ሚትራዳቴ፣ ፃብዔኤሌንታ ሜሌ ዔያቶና ዋላ ዓኣ ዓሳ ዋጌና ዔያታ  
ዓርቄንታንዳጉዲ ጋዓ ዋርቃታ ፃኣፒ ካኣቲም ሺኢሺኔ፤ ዬይ ዋርቃታ  
ፃኣፒንቴሣ ሶኦሪያ ዓጪ ፒዳኣሌና ሙኡቸና ማዔሣር ናባቢንቴ  
ቡሊ ኬኤዚንታንዳጉዲ ዳከንቴያኬ።

8 ዬያጉዲ ሃሣ ዓጮ ዋይሣ ሬሁሜና ፃኣፓሣ ሸምሻዬና  
ዩሩሳላሜ ዛሎ ሃካፓ ዴማ ዓኣ ማሊያ ካኣቲም ፃኣፔኔ።

4:2 2ካኣቶ. ማ 17:24-41። 4:6 ዓሰቲ. 1:1።



9 ዓጮ ወይህ ሬሁሜና ፃኣገህሂ ሸምሻዬ፤ ሃሃህ ዔያቶና ዋላ ዋጎ ዋጋ ዓሶንታ ቲሪፖሊሴይዳ፣ ፓሪሴይዳ፣ ዔሬኬይዳ፣ ባብሎኔና ሱሳናይዳ ናንጋ ቢታንታ ዓኣ ሃንጎ ዓሳኣ ቢያ፤

10 ዋልቆና ጳኤፖ ካኣታህሂ ዓሴናፔሬ ሸይንቴ ዓጮፓ ሳማሪያ ካታሞና ዔፕራዲሴኮ ዓባ ጌላ ዛሎ ዳኪ ዲማ ዲማ ቤዛ ናንጋንዳጉዲ ዒ ማሄ ሃንጎ ዳሮና ዋላ ዒ ፃኣፔያ ማዓዛ፡

11 ፃኣፒንቴ ዋርቃቴሎኮ ጳኤፖ ማሊፃ ሂዚ ጋዓያኩ፡- ዔፕራዲሴኮ ዓባ ጌላ ዛሎና ናንጋ ኔኤኮ ማዳዞንሂፓ ካኣቲ ዓርፄክሲሴም ዳከንቴያ፡

12 «ጳኤፖ ቦንቸንታሂዮ! ኔ ኮይላፓ ሙኩ ዓይሁዶ ዓሳ ዬሩሳላሜይዳ ዳዒ ዬኖ ዋይዞ ዒፃ ፑርቶ ካታሜሎ ገንህ ኮሺ ማዢሂዳኬ፤ ዲሮዋ ዓካሲ፣ ጌኤዢ ማኣሮዋ ማዢዮ ዓርቄ፡፡

13 ዬያሮ ካኣቲዮ! ዬና ካታሜላ ገንህ ማዢንቴዲሮ ማዳኣ ገኢጊ ጋፔያታቶ ዳራ ገኢሮ ኔኤም ጨጊዮ ሃሻንዳኔ፤ ሃሃህ ኔኤም ዒንገንታ ካኣቲሞ ማኣሪ ጌላ ባካኣ ፓጫንዳሂ ዔሬ!

14 ኦኡኒ ካኣቲ ማኣራፓ ዳንቃ ባኣዚ ዓኣያታሂሮ ኔኤኒ ቶኦቸንቴም ዚቲ ጌይ ዛጊፃ ኦም ኮሸኩዋኣያ ማዔም ሃያ ከኢቶ ኦ ኔኤም ዳኬኔ፤

15 ኔኤኮ ቤርታኣ ዓዶንሂ ሃይሶይዳ ፃኣፒንቴ ዓኣ ባካ ዛገንታንዳጉዲ ኔ ዓይህንዳጉዲ ኦ ኔኤም ኬኤዛኔ፤ ዬይ ዛገንታ ዋዶና ዬና ካታሜላ ቢያ ዋዳ ዋይዚ ዒፃያ፡ ሃሃህ ሚናኣፓ ዓርቃዖ ካኣቶና ዲማ ዲማ ዓጮ ወይህ ዓሶ ዋማይዲ ዔያታ ሜታሳቴያ ማርካ ማዓ ባኣዚ ዬና ዛጋ ዓሳ ዳንቃንዳኔ፤ ሚናፓ ዒዞይዳ ዓኣ ዳራ ዋይዙዋኣያኬ፤ ሃያኮ ቤርታ ካታሜላ ዶዒ ባይቃንዳጉዲ ማዳንቴሂ ዬያሮኬ፡፡

16 ዬና ካታሜላ ገንህ ላሚ ማዢንቴ፡ ዲሮ ኮሺፃኣ ዒዞኮ ጋፔሰካፓ ካኣቲዮ! ዔፕራዲሴኮ ዓባ ኬሰካ ባንፆና ዓኣ ዓጮይዳ ቤሲ ኔኤኮ ባኣያ ማዓንዳሂ ኦ ኔኤም ኬኤዛኔ» ጋዓያኬ፡፡

17 ዬናኮ ካኣቲ ማሃዖ፡- «ዓጮ ወይህ ሬሁሜም፡ ፃኣገህሂ ሸምሻዬም፤ ዬያጉዲ ሃሃህ ሳማሪያና ዔፕራዲሴ ዋሮኮ ዓባ ጌላ ባንፆይዳ ዓኣ ዳሮናም ቢያ፡ ዒንሂ ኮሺዳ?

18 «ዒንሂ ታኣም ፃኣፒ ዳኬ ዋርቃታ ናባቢንቴ ቡሊንቴም ታ ዋይዜኔ፤

19 ዬና ማሊዖና ዒንሂ ጌዔ ጎይዖ ዔባ ዛገንታንዳጉዲ ታ ዓይህኔ፤ ዬያሮ ዛጋ ዓሳ ዒማና ዳንቄ ጎይዖና ዬሩሳላሜ ሚናፓ ዓርቃዖ ካኣቶም ዋይዚ ዒዲ ናንጋያ፡ ሜታሳ ዓሲ ኩሜ ካታማታሂ ዔርቄቴ፤

20 ያዲ መግባትና ዩራሳላሜይዳ ዔፕራዊሴኮ ባባ ኬሰካ ባንዮና ዓኣ ዓጮ ቢያ ጊኢራ ጊኢራሻያ፤ ሃሣ ኮርሞ ኮርማ ዓሶፓ ሚኢሼ ጨገሻ ዔርቴ ካኣታ ዒኢካ ካኣታዳ።

21 ዩያር ታ ላሚ ሃሣ ሜሌ ኪኢታ ዒንሢሞ ዳካንዳያ ሄላንዳኣና ዩና ዓሳ ካታሜሎ ጊንሣ ማዢያ ሃሻንጎ ጎዑዋቴ፤

22 ኦኡኮ ካኣቱሞይዳ ዓይጎ ሜታኣ ሄሉዋጉዲ ዩና ዘሎ ዒንሢሞ ዔሩዋቴ!» ጌይ ዳኬ።

23 ዩካፓ ካኣቱ፣ ዓርፄክሲሴ ማሂ ዳኬ ዋርቃታ ሙኪ ሬሁሜሞ፣ ሸሞሻዩና ዔያቶና ዋላ ዓኣ ዓሶሞ ቢያ ናባቢንቴሰካፓ ዔያታ ኔጉዋዎ ዩሩሳላሜ ሙኪ ዓይሁዳ ዩሩሳላሜ ጊንሣ ማዢያ ሃሻንዳጉዲ ላኣጌ።

24 ዩያር ዳኣሪዮሴ ፓሪሴይዳ ካኣታዳ ላሞዓሳ ሌዎ ሄላንዳኣና ጌኤዢ ማኣሮ ማዳ ላኣጊንቴሢሮ ማዳ ዓርቂንቴ ቤዛ ዔቂ ዓቴ።

### 5

#### ጌኤዢ ማኣሮ ማዢ ጊንሣ ዓርቆናሢ

1 ዒማና ያኦሲ ማሊያ ኬኤዛ ላሞዎንሢ ሃጌንታ ዒዶ ናኣዚ ዛካሪያሴንታ ዩሩሳላሜና ዩሁዳ ዓጮናይዳ ናንጋ ዓይሁዶ ዓሶሞ ዒሰራዔኤሌ ያኦሲ ሱንዮና ያኦሲ ማሊሢ ኬኤዜ።

2 ሳላቲያሌ ናኣዚ ዜሬባቡሌና ዒዮፄዳቆ ናኣዚ ዒያሱና ዩንሢ ያኦሲ ማሊያ ኬኤዛዘንሢኮ ሃይሶ ዋይዛዎ ዩሩሳላሜይዳ ጌኤዢ ማኣሮ ማዢያ ጊንሣ ዓርቆ። ዩንሢ ላሞዎ ያኦሲ ማሊያ ኬኤዛዘንሢያ ዔያቶ ማኣዳ።

3 ዔፕራዊሴኮ ባባ ኬሰካ ባንዮ ዓጮ ዋይሣያ ማዔ ታቴናዩና ሺታርቦዝናዩና፤ ዩያጉዲ ሃሣ ዔያቶና ዋላ ቢታንታ ዓኣ ዓሳኣ ዩሩሳላሜ ሙካዎ፡- «ሃያ ጌኤዢ ማኣሮ ማዢያ፣ ሃሣ ዲሮዋ ዓካሲ ኮሻሞ ያኦኒ ዒንሢ ዓይሢይ?» ጌይ ያኦጮ።

4 ጌኤዢ ማኣሮ ማዢና ዔያቶና ዋላ ዔቂ ዓሶኮዋ ሱንዮ ዔራኒ ዔያቶ ያኦጮ።

5 ጋዓንቴ ዓይሁዶ ዓሶኮ ሱኡጎ ያኦሲ ካፓያታሢሮ ዩያታ ፓርሴ ዓጮኮ ቢታንታ ዓኣ ዓሳ ዳኣሪዮሴሞ ዒ ዋዚ ጋዓቴያ ዋይዛኒ ኪኢታ ያኣፒ ዳካዎ ማዶ ማዲያ ዓሶ ላኣጊባኣሴ።

6 ዒማና ዔፕራዊሴኮ ባባ ጌላ ዘሎ ዓጮ ዋይሣ ታቴናዩና ሺታርቦዝናዩና፤ ዩያጉዲ ዔያቶና ዋላ ዓኣ ዓሳ ካኣቱሞ ሂዚ ጋዓ ኪኢታ ያኣፒ ዳኬ።

5:1 ሃኣጌ 1:1፤ ዛካ. 1:1። 5:2 ሃኣጌ 1:12፤ ዛካ. 4:6-9።

7 «ዳኤፖ ቦንቸንታ ካኣታሦ ዳኣሪዮሴ! ኔ ዓጮም ኮሹሞ ማፖንጎ፤

8 «ካኣቲዮ! ኦኡኒ ዪሁዳ ዓጮ ዳንዴንቴ ዒኢካ ዳኤፖ ያኦዛሂኮ ጌኤዡ ማአራ ሹቸና ዓርሲንቴ ሚሢና ጊንሣ ማዢንታንቴ ኦ ዛጌያታሢ ኔና፡ ዳኤፖ ቦንቸንታሢም ዓርቴያ ማፖንጎ፤ ዩይ ማዳ ዔያቶኮ ጋርቻ ዛጊ ዓርቂ ማዳሻሢረ ሩኡሪና ማዳንታ።

9 «ኦኡኒ ዒማና ዴሮኮ ሱኡጎ ኮራ፡- ሂያ ጌኤዡ ማአረ ጊንሣ ዒንሢ ማሂ ማዡንዳጉዲና ዲሮሞ ዓካሳንዳጉዲ ያ ዒንሢ ዓይሤይ?» ጌይ ያኦጮኔ፤

10 ዩያ ሌሊቱሞንቴ ዩያ ማዳ ማዳሻ ሱኡጋ ያናንሢታቴያ ሱንያ ዔያቶኮ ኔኤም ከኤዛኒ ኦ ዔያቶ ያኦጮኔ።

11 «ዔያታ ኦም ዒማና፡- ኦኡኒ ጮሪንጮና ሳያና ማዢ፡ ዳኤፖ ያኦዛሂኮ ማዳዞንሢ፤ ዩያሮ ዒዛም ሚርጌ ሞዳኮ ቤርታ ፔቴ ዴኤፒ፡ ዒሰራዔኤሌ ዓሶኮ ካኣቲሰኬይ ማዢ ጌኤዡ ማአረና ዲሮና ጊንሣ ኦ ማዡኔ፤

12 ጋዓንቴ ኦኡኮ ቤርታኣ ዓድንሢ ዩያ ጮሪንጮ ያኦዛሢ ዳጋሴሢረ ካላዳ ዓጮ ካኣቶ ዜርፃፓ ባብሎኔ ካኣቲናብካዳናያኦሬ ያሎና ዔያቶ ባሻንዳጉዲ ማሂ፤ ዒማና ጌኤዡ ማአራ ሻሂንቴ፤ ዴራኣ ዲዒንጎቲ ባብሎኔ ዓጮ ዓኣዳ።

13 ዩካፓ ቁኢሮሴ ባብሎኔይዳ ካኣታዳ ቤርታጎ ሌያና ዩያ ጌኤዡ ማአረ ጊንሣ ኦ ማዡንዳጉዲ ኦና ዓይሤሢ ፔኤሮ ካኣቲ ቁኢሮሴኬ።

14 ናብካዳናያኦሬ ሃይካ ዩሩሳላሜይዳ ማዢንቴ ቤርታኣ ጌኤዡ ማአራፓ ዲዒ ዔኬ ባኮና ባብሎኔይዳ ዔያቶኮ ያኦዞ ካኣሽኮ ቤዘይዳ ጌሤ ሞርቆና ኮሽንቴ ጌኤዡ ማአረ ሚሆ ቢያ ቁኢሮሴ ማሂ ኦም ዒንጌ፤ ዩይ ጌኤዡ ማአረ ሚሃ ኦም ማሂ ዒንጊንቴሢ ዪሁዳ ዓጮ ሞይሃንዳጉዲ ማሂ ዶኦርና ሽሽባፃሬ ጌይንታ ዓሢ ዛሎናኬ።

15 ዩይ ዓጮ ሞይሃ ሽሽባፃሬ ዩንሢ፡ ጌኤዡ ማአረ ሚሆ ጊንሣ ማሂ ዔከ ሙኪ ዩሩሳላሜይዳ ዓኣ ጌኤዡ ማአረ ዩሃንዳጉዲ፤ ዩያጉዲ ሃሣ ጌኤዡ ማአረ ቤርታ ዓኣ ቤዛ ማዢሳንዳጉዲ ካኣቲ ቁኢሮሴ ዓይሤ።

16 ዩያሮ ሽሽባፃሬ ሙኪ ማአረ ማዢሶ ዓይሤ፤ ዩካፓ ሹጮና ማዡ ማአራ ማዢንቶ ዓርቂም ሃሮ ሄላንዳኣና ማአራ ማዢንቴሢዳኬ፤ ጋዓንቴ ጌኤዡ ማአረ ሹጮና ማዡሢ ሃጊ ጋፒባኣሴ» ሂዚ ጌይ ከኤዜ።

5:12 2ካኣቶ. ማ 25:8-12፤ 2ያኦሲ. ዓሃኬ 36:17-20፤ ዔር. 52:12-15። 5:13 ዓ.ዘ. 1:2-11።

17 «ካአቲዮ! ጎኔና ዬይ ጌኤዠ ማኣራ ዬሩሳላሜይዳ ማዠፍንታዳጉዲ ካአቲ ቁኢሮሴ ዓይሠቴያ ዓይሠባአቲያ ዔራኒ ባብሎኔይዳ ካአቲሞ ማኣራ ፃአፒ ጌሦና ማርካ ማዓ ባኣዚ ዓኣቶ ዛገሲ፣ ሃያ ባኮ ኔ ዎዚ ጋዓቲያ ኑሞ ኔ ኬኤዛንዳጉዲ ኑ ኔና ሺኢቃኔ።»

# 6

## ቁኢሮሴ ዓይሠ ዓይሠፆ ኮዒ ዴንቆናሠ

1 ባብሎኔይዳ ካአቲሞ ማኣራ ዓኣ ፃአፒ ጌሦና ባካ ቢያ ኮይ ዛገንታንዳጉዲ ካአቲ ዳኣሪዮሴ ዓይሠኔ፤

2 ጋዓንቴ ዬይ ባካ ባብሎኔይዳቲሞንቴ ዒዞ ዓጮኮ ሜዶኔይዳ «ዓህሚታ» ጌይንታ ካታሚይዳ ፔቲ ቢራና ጌይንታያ ማሪንቴ ባኣዚዳ ጴዳኔ፤ ዬሩ ጋራ ፃአፒንቴ ባካ፡-

3 «ቁኢሮሴ ካአታዳ ቤርታሳ ሌዖና ዬሩሳላሜይዳ ዓኣ ጌኤዠ ማኣሮይዳ ፆኦሲሞ ሚቺ ዒንጎ ዒንገይንታ ሚሌ ዲማ ዲማ ዒንገይ ዒንገንታንዳጉዲ ጌኤዠ ማኣራ ገንሣ ማዠፍንታንዳጉዲ ዓይሠኔ፤ ዬያ ጌኤዠ ማኣሮኮ ዖደሱማ ላሂታሚ ዋዳ፣ ጋሮ ዳልጉማኣ ላሂታሚ ዋዳ ማዓንዳያ ኮይሳኔ።

4 ዲራ ሃይሦ ሺርሺ ሹቻ ከልቂ ዲርቆናያ ዬያ ከኤሎ ዲዖኮ ቶኦካ ፔቲ ሺርሺ ጫርጊ ዲርቆና ሚሠ ዲርሲ ዓኣያ ማዖንጎ፤ ዬያ ማዶሞ ቢያ ኮይሳ ሚኢሻ ካአቲሞ ማኣራ ሚኢሻ ጌሦ ከኤፃፓ ዒንገንቶንጎ።

5 ዬያጉዲ ሃሣ ሃያኮ ቤርታ ካአቲ ናብካዳናፆኦሬ ዬሩሳላሜይዳ ዓኣ ጌኤዠ ማኣራፓ ዲዒ ከሴ ዎርቆና ቢሮ ዓንጎናይዳፓ ኮሺንቴ፣ ጌኤዠ ማኣሮይዳ ማዲንቶ ሜሃ ገንሣ ማዒ ዬሩሳላሜይዳ ማዠፍንታ ጌኤዠ ማኣሮይዳ ኮይሳ ቤዛ ጌሠንቶንጎ» ጋዓያኩ።

6 ዬያሮ ዳኣሪዮሴ ሃካፓ ዴማ ዓኣ ኪኢቶ፡- «ዔፕራዲሴኮ ዓባ ኬሰካ ባንዖና ዓኣ ዓጮ ዎይሣ ታቴናዬና ሺታርቦዝናዬናሞ፣ ዔፕራዲሴኮ ዓባ ጌላ ባንዖይዳ ዒንሠና ዎላ ዓኣዞንሠሞ ቢያ፤ ጌኤዠ ማኣሮ ባንሠ ዑኪፖቴ፡

7 ማዳ ማዲንቲሞጉዲ ዲቂፆዎ ሃሹዎቴ፣ ዪሁዳ ዓጮ ዎይሣሠና ዓይሁዶ ዓሶኮ ሱኡጎና ፆኦሲኮ ጌኤዠ ማኣሮ ሚና ቤርታ ዓኣ ቤዘይዳ ገንሣ ማዠፍንጎ።

8 ሃይማና ጌኤዠ ማኣሮ ማዶ ኮሺ ዒንሠ ዔያቶ ማኣዳንዳጉዲ ታ ዒንሠ ዓይሠኔ። ዬያሮ ዬያ ማዶ ማዲሾንዶ ሚኢሻ ቢያ ዔፕራዲሴኮ ዓባ ኬሰካ ባንዖና ዓኣ ዓጮፓ ካአቲኮ ጊኢሮ ማዒ ቡኩሶና ሚኢሻፓ

ዑኩና ከሲንቲ ዔያቶም ዒንገንቶጎ፤ ማዳ ደቁንቲ ዔቃንዲያ ኮይሱብሴ።

9 ቃሲ ሃሃ ዩሩሳላሚይዳ ዓአ ቁኤሳ ዒንሢም ከኤዛ ጎይያ ከላ ከላ ጨሪንጫ ሩንጋ ያኦዛሢም ዔያታ ዒንጋ ዒንገይም ኮዓ ዚዮ ጌማታ፣ ማራቶ ዓዳ፣ ማራናኦቶ ዓዳ፤ ዩያጉዲ ሃሃ ዒንገይማ ማዓ ዛርጋሢ፣ ሶኦጋ፣ ዋይኖ ዑዠንታ ሪሚታፓ ኮሾ ዛይቶዋ ቢያ ዔያቶም ዒንገቶቲ።

10 ዩይ ቢያ ያዲ ማዲንታኒ ኮይሳሢ ጨሪንጫ ያኦዛሢ ዋዛና ዔካ ዒንገይ ቢያ ሺኢሺሢና ታኦና ታ ሩኦቶና ሽምፓሢም ዔያታ ሺኢቃንዳጉዲኬ፤

11 ዩያ ሌለቱቀንቲ ሜሌ ታ ዔርዛኒ ኮዓ ባኦዚ ዓይጎዳይ ጌዔቲ፡- ሃያ ታ ዓይሢያ ዔኩቀኦያና ዋይዙቀይ ዓይጎ ዓሲታቶዋ ዒዛኮ ማኦር ቱርቱራፓ ፔቲ ቱገንቲ ዓርሲ ዓጪሴሰካፓ ጫርጊ ዒዛ ሱያንጎ፤ ዩካፓ ማኦራ ዒዛኮ ሻሂንቲ ቡኡራ ላኦሎ ቤሲ ማያንጎ።

12 ሃያ ዓይሢያ ዋይዙ ዒዲ ዩሩሳላሚይዳ ዓአ ያኦሲኮ ጌኤዠ ማኦር ሻሂን ማላ ዓይጎ ካኦቲ ማዔቲያ ዳሬ ዒዛኮ ሱንፃ ዔኤለንታ ቤሲ ማዓንዳጉዲ ደኦሪ ያኦዛሢ ዩያ ባይዘንጎ፤ ሃያ ከኢቶ ዓይሢያ ዳኬሢ ታና፣ ዳኦሪዮሴ ማዔሢር ጉቤ ባካ ማዲንቲ ኩማንዲያ ኮይሳኔ» ጌይ ዳኬኔ።

**ጌኤዠ ማኦራ ማዢንቲ ጋፔሢር ቦንቾና ቦንቾ**

13 ዩካፓ ዓጮ ዋይሢ ታቲናዩንታ ሽታርቦዝናዩንታ ዔያቶና ዋላ ቢታንታ ዓኦ ዓሳ ካኦቲ ዔያቶ ዓይሢ ጎይያና ቢያ ባኮ ማዲ ኩንሣኔ።

14 ዓይሁደ ዓሶኮ ሱኡጎንታ ያኦሲ ማሊያ ከኤዛ ሃጌና ዛካሪያሴና ዔያቶ ደዲሺ ደዲሺ ጌኤዠ ማኦር ማዳ ዑካሴኔ፤ ዒሰራዔኤሌ ያኦዛሢ ማሊያጉዲ ፓርሴ ካኦታ ቁኢርሴንታ ደኦሪዮሴንታ ዓርፃክሲሴንታ ዓይሢ ጎይያ ጌኤዠ ማኦር ማዳ ማዲ ጋፔሴኔ፤

15 ዩያ ጌኤዠ ማኦር ዔያታ ማዢ ጋፔሴሢ ዳኦሪዮሴ ካኦታዳንቲ ላሃሳ ሌዮኮ ዓዳሬ ጌይንታ ዓጊና ፃኤሬም ሃይሣሳ ከሎናኬ።

16 ዩካፓ ዒሰራዔኤሌ ዳራ፣ ቁኤሶንታ ሌዊ ዓሶንታ፤ ዩያጉዲ ዲዒንቶፓ ማዔ ሃንጎ ዓሳ ቢያ ጌኤዠ ማኦራ ማዢንቲ ጋፔሢር ቦንቾ ከሊ ዋዛና ቦንቼኔ።

17 ዔያታ ዒማና ቢያ ዩያ ቦንቾ ከሎም ማዓያ ፔቲ ፃኤታ ዚያ ጌማይ፣ ላምዎ ፃኤታ ዓዳ ማራይ፣ ያይደ ፃኤታ ማራናይ ዓዳ ዒንጎ

---

6:14 ሃኦጌ 1:1፤ ዛካ. 1:1።

ዒንገሠ ማሃ ሺኢሼኔ፤ ሃሣ ጎሜ ጌኤሺሠ ዛላ ዒንጎ ዒንገሠ ማዓ ታጳ ላምዎ ኮላይ ፔቴ ፔቴ ዒሰራዔኤሌ ዓሶኮ ፃጳ ሱንዖና ሺኢሼኔ።  
 18 ዩካፓ ሙሴኮ ዓሶ ዎይሦ ዎጋ ፃኣፒንቴ ጎይዎ ዩሩሳላሜይዳ ማዢንቴ ጌኤዢ ማኣሮ ማደም ቁኤሶና ለዊ ዓሶና ዔያታ ፔ ቤዛ ቤዛ ማሃ ገኢሊሼኔ።

**ዑሣ ዓኣዲዎ ቦንቾ ኬሎ**

19 ዲዒንታፓ ማዔ ዓሳ ቤርታሳ ዓገሮኮ ታጳ ያይዳሳ ኬሎና ዑሣ ዓኣዲዎ ቦንቾ ቦንቹኔ።

20 ዒማና ቁኤሶና ለዊ ዓሶና ቢያ ዎጎ ጎይዎ ዳምቦና ፔ ቶኦኮ ጌኤሼኔ፤ ሃሣ ለዊ ዓሳኣ ቦንቾ ኬሎይዳ ዲዒንታፓ ማዔ ዳሮና ቁኤሶናም፤ ዩያጉዲ ሃሣ ፔ ቶኦኮም ዔያታ ሺኢሼ ቆልሞዎ ሹኬኔ።

21 ዒንጎ ዒንገዎ ቢያ ዲዒንታፓ ማዔ ዒሰራዔኤሌ ዓሳ፤ ዩያጉዲ ሃሣ ዩሮ ዓጮይዳ ናንጋ ሜሌ ዓሶ ዳምቦ ሃሺ ናንገና ናንጋ ጎዳ ማዔ ዒሰራዔኤሌ ያኦዛሠ ካኣሽካ ዓሳኣ ቢያ ሙዔኔ።

22 ናንገና ናንጋ ጎዳ ፔኤሮ ዓሶኦሬ ካኣቴ ዔያቶ ናሽካንዳጉዲና ናንገና ናንጋ ጎዳ ማዔ ዒሰራዔኤሌ ያኦዛሠ ጋላቴንታ ጌኤዢ ማኣሮ ገንሣ ዔያታ ማዢንዳጉዲ ማደና ቢያ ዔያቶ ዒ ማኣዳንዳጉዲ ማሃሠሮ ላኣዳ ሙዒ ቦንቾ ኬሎ ላንካይ ኬሊ ኩሙሠ ዴኤፒ ዎዛና ዔያታ ቦንቹኔ።

**7**

**ዒዘራ ዩሩሳላሜ ሙኬሠ**

1 ዩካፓ ሚርጌ ለዔ ዳዓዎ ዓርፄክሲሴ ፓርሴ ካኣቴ ማዔ ዎዶና ዒዘራ ጌይንታ ፔቴ ዓሲሰኬይ ዒኢካ ናንጋኔ፤ ዒዛኮ ቤርታኣ ዓዶንሠ ሸይንቶ ፃጳ ዳንዲ ዳኤፓሠ፣ ቁኤሶ ቢያኮ ዑፃሣ፣ ዓኣሮኔ ሄላንዳኣና ፓይዲንታዛ ሃካፓ ዳማ ዓኣ ጎይዎኬ፤ ዩይያ፡- ዒዘራ ሴራያ ናይ ማዓዛ፣ ሴራያ ዓዛሪያ ናይ፣ ዓዛሪያ ሂልቁያ ናይ፣ ሂልቁያ ሻሉሜ ናይ፣

2 ሻሉሜ ሳዶቁ ናይ፣ ሳዶቁ ዓሂፁቤ ናይ፣ ዓሂፁቤ ዓማሪያ ናይ፣

3 ዓማሪያ ዓዛሪያ ናይ፣ ዓዛሪያ ሜራዮቴ ናይ፣ ሜራዮቴ ዜራህያ ናይ፣

4 ዜራህያ ዑዚ ናይ፣ ዑዚ ቡቁ ናይ፣

5 ቡቁ ዓቢሹዓ ናይ፣ ዓቢሹዓ ፒንሃሴ ናይ፣ ፒንሃሴ ዓላዜሬ ናይ፣ ዓላዜሬ ቁኤሶ ቢያኮ ዑፃሣ ዓኣሮኔ ናይኬ።

---

6:19 ኬሲ. ማፃ 12:1-20።

6 ዩይ፡ ዒዘራ ባብሎኔይዳፓ ዩሩሳላሜ ሙኬኔ፤ ዒዚ ናንጊና ናንጋ ጎዳ ማዕ ዒሰራዔኤሌ ያኣዛሢ ሙሴም ዒንጌ ዎጎ ኮሺ ዔራያኬ፤ ናንጊና ናንጋ ጎዳ ማዕ ያኣሲኮ ዎልቃ ዒዘና ዎላ ዓኣሢሮ ዒዚ ያኣጩ ባኮ ቢያ ካኣተ ዒዛም ዒንጌ።

7 ዩያጉዲ ሃሃ ካኣተ ዓርፄክሲሴ ካኣታዴንቴ ላንካሳ ሌያና ዒሰራዔኤሌ ናኣቶ ባኣካፓ ቁኤሳ፡ ሌዊ ዓሳ፡ ዓይኑም ዓይናዳ ዓሳ፡ ጌኤዠ ማኣሮ ካሮ ካፓ ዓሶንታ ጌኤዠ ማኣሮይዳ ማዳ ዓሳኣ ዒዘራና ዎላ ዩሩሳላሜ ሙኬኔ።

8 ካኣተ ዓርፄክሲሴ ካኣታዴ ላንካሳ ሌያኮ ደንጋሳ ዓጊኖና ዒዘራ ዩሩሳላሜ ሙኬኔ።

9 ያኣሲኮ ዴኤፖ ዎልቃ ዒዛይዳ ዓኣሢሮ ባብሎኔይዳፓ ቤርታሳ ዓጊኖኮ ቤርታሳ ኬሎና ዔቁ ዩሩሳላሜ ደንጋሳ ዓጊኖኮ ዓይያይዳ ሄሌኔ።

10 ዒዘራ ናንጌ ዎዶ ቢያይዳ ናንጊና ናንጋ ጎዳኮ ዎጎ ናባቢሢና ዩያ ናባቢሢ ማዳይዳ ፔኤሺሢና፤ ዩያጉዲ ሃሃ ናንጊና ናንጋ ጎዳኮ ዓይሢያንታ ዎጎንታ ደምቦንታ ዒሰራዔኤሌ ዴሮ ጉቤሢም ዔርዚ ዔርዚ ማዳይዳ ፔኤሻያኬ።

**ካኣተ ዓርፄክሲሴ ዒዘራም ፃኣፒ ዒንጌ ከኢቶ**

11 ናንጊና ናንጋ ጎዳ ዒሰራዔኤሌ ዓሶም ዒንጌ ዎጎንታ ዓይሢያንታ ቢያ ኮሺ ዔራያ ማዕ፡ ቁኤሳሢ ዒዘራም ካኣተ ዓርፄክሲሴ ፃኣፒ ዒንጌ ዎርቃታ ሃካፓ ዴማ ዓኣሢኬ፤ ዩይያ፡-

12 «ካኣቶኮ ካኣተ ዓርፄክሲሴይዳፓ ጫሪንጮ ያኣዛሢኮ ዎጎ ናባቢ ዔሪያና ዴኤፒ ዔራ ማዕ ቁኤሳሢ፡ ዒዘራ ኔ ኮሺዳ?»

13 «ታኣኒ ዎይሃ ካኣቱም ዓጮ ጋራ ዓኣያ፤ ሃሃ ኔኤና ዎላ ዩሩሳላሜ ማዕ ዓኣዳኒ ኮዓ ዒሰራዔኤሌ ዓሶንታ ቁኤሶንታ ሌዊ ዓሳኣ ቢያ ማዕ ዴንዳንዳጉዲ ታ ዓይሢኔ፤

14 ታኣኮ ላንካዎ ደንዘና ዎላ ዔኤዒ ጌሰተ ኑ ዔቁሴ ጎይያና ኔ ኩጫ ዓኣ ያኣሲ ዎጎና ዓይሢያና ማዳይዳ ፔኤቃሢ ዛጊ ዛጊ ዩሩሳላሜና ዩሁዳናይዳ ማዳንታ ባኮ ኔ ዛጋንዳጉዲ ታ ኔና ዳኬኔ።

15 ቃሲ ሃሃ ዩሩሳላሜይዳ ጌኤሺ ማኣሪ ማዠንጉቴ፡ ዒሰራዔኤሌ ያኣዛሢም ታኣና ታኣኮ ደንዘና ኑ ኑ ሺኔና ናሽኪ ዒንጌ ቢሮና ዎርቆና ዔኪ ዴንዴ።

16 ዩያ ሌሊቱዎንቴ ኔኣኒ ኔኤሮ ባብሎኔ ዓጫፓ ቡኩሴ ዎርቆና ቢሮና፡ ዒሰራዔኤሌኮ ዴሮንታ ዔያቶኮ ቁኤሳኣ ዓቱዎፖ ዩሩሳላሜይዳ ማዠንጉቴ ዔያቶኮ ያኣዛሢ ጌኤዠ ማኣራ ዔያታ ሺኣሻኒ ኮዓ ዒንጊያ ቢያ ዔኪ ዴንዴ።

17 ይህ መጠራት ዘገ መደ መዳንዳጉዲ ማሄ፤ ገመድ ዚያ፣ ጳጳሪ ማደ ማራቶንታ ማራናኦቶንታ፣ ዲንጊያም ማዳ ሃኦንታ ዋይኖ ዑዙዋ ሃሹዋዎ ዩሩሳላሜይዳ ማዢንቲ ዲንሢ ያኦዛሢኮ ጌኤዢ ማኦሮይዳ ዓኣ ዲንጎ ባኮ ዲንጎ ቤዘይዳ ዲንጊንታ ዲንጊያ ቢያ ሻንቄ።

18 ዩካፓ ዓታ ቢሮና ዋርቆና ዲንሢኮ ያኦዛሢ ማሊያጉዳያ ኔኤና ኔ ዓሶና ዲንሢ ኮዓ ባኦዚ ማዲዋቲ።

19 ጌኤዢ ማኦሮይዳ ማዳንዳጉዲ ዲንጊንቲ ዲመጪ ማሆ ዩሩሳላሜይዳ ካኦሽኪንታ ያኦዛሢም ኔ ሺኢሻንዳ።

20 ሃሣ ጌኤዢ ማኦሮይዳ ማዲንታኒ ኔኤም ኮይሳ ማሌ ባኮ ቢያ ካኦቲዋ ማኦሮኮ ማሆ ጌሃ ማኦራፓ ኔ ዔካኒ ዳንዳዓ።

21 «ዔፕራዲሴኮ ዓባ ጌላ ባንዎና ዓኣ ዓጮኮ ቢታንታ ዓኣ ዓሳ ቢያ ጫሪንጮ ያኦሲ ዲንጌ ዋጎና ዓይሢያ ኮሺ ዔራ ቄኤሳሢ ዲዘራ ዲዛም ኮይሳ ባኮ ያኦጫሢ ጉቤ ዲንሢ ኩንሣንዳጉዲ ታኦኒ ዓርፄክሲሴ ዓይሣ።

22 ዩይያ፡- ሃይሃ ሺያና የይዶ ጻኤታ ኪሎ ማዳ ቢራ፣ ታጾ ሺያ ኪሎ ማዳ ዛርጌ፣ ላምዎ ሺያ ደሎዜ ማዳ ዋይኔ ዑሹ፣ ላምዎ ሺያ ደሎዜ ማዳ ሪሚቲ ዛይቲንታ ሶኦጌያ ዲዛም ኮይሳሢጉዳያ ዲንጉዋቲ።

23 ጫሪንጮ ያኦዛሢኮ ጌኤዢ ማኦሮ ማዲም ኮዓ ባኮ ቢያ ዲንጋንዳያ ዲንሢ ኮይሳያታሢ ዋሊፖቲ፤ ዲዚ ታናንታ ታኦኮ ጊንፃ ኬሰካንዳ ካኦቶ ዑያይዳ ማቶ ዔኪ ዩዑዋጉዲ።

24 ዩያጉዲ ሃሣ ቄኤሳ፣ ሌዊ ዓሳ፣ ዓይኑም ዓይናዳ ዓሳ፣ ጌኤዢ ማኦሮኮ ካሮ ካፓ ዓሶንታ፤ ጉቤና ጌኤዢ ማኦሮ ዛላ ማዳ ዓይጎ ማዲዋ ማዳ ዓሶይዳፓ ቢያ ጊኢራ ዲንሢ ዔካንዳያ ኮይሱዋሴ።

25 «ኔኤኒ ዲዘራ! ኔ ያኦዛሢ ኔኤም ዲንጌ ዔራቶጉዳያና ያኦዛሢ ዋጎና ዋይሣንዳ ዓሲ፣ ዔፕራዲሴኮ ዓባ ጌላ ባንዎና ዓኣ ዓጮ ዓሶ ዋይሣንዳ ዓሲና ጌኤሲያ ዔያቶም ጌሰታንዳ ዓሲ ደኦሬ፤ ሃሣ ዔራዋ ዓሶማኣ ቢያ ኔ ያኦዛሢኮ ዋጎ ዔርዜ፤

26 ዩካፓ ያኦሲ ዋጎም ማዔቲ ካኦቲ ዋጎም ዓይሢንቲዋ ዓይጎ ዓሲያኣ ዓኦቲ ኮሺ ዛጊንቲ ሃይቃንዳጉዲ ሃንጎ ዓጫፓ ዳውሲንታንዳጉዲ ሃንጎ ዲዛኮ ዓኣ ባካ ዓርቂ ዔከንታዳጉዲ ዔይዔ ጌዔቲ ቲኦሲና ዋጊንቶንጎ» ጋዓያኬ።

**ዒዘራ ያኦሲ ጋላቲሢ**

27 ዓማና ዲዘራ፡- «ናጊና ናንጋ ጎዳ ማዔ ኑ ዓደንሢ ያኦዛሢ ጋላቲንቶንጎ! ዩሩሳላሜይዳ ማዢንታ ያኦሲ ማኦሮ ካኦቲ ቦንቻንዳጉዲ ማሄሢ ዲዛኬ፤



28 ያኑሲ ጌዔሢሮ ካኣቲንታ ዒዘኮ ደንዘንታ ሃሣ ቢታንታ ዓኣ ዓሳ ታና ናሽኬኔ፤ ናንጊና ናንጋ ጎዳ ማዔ ታ ያኣዘሢ ታና ደዲሼሢሮ ዒሰራዔኤሌ ፃጸኮ ሱኡጋፓ ሚርጌሢ ታኣና ዋላ ቡኪ ዩሩሳላሚ ሙካንዳጉዲ ዞሪ ታኣኒ ዔያቶ ዔኤዒሳንዳጉዲ ታና ማሃኔ» ጌይ ያኑሲ ጋላቲኔ።

# 8

## ዒዘራና ዋላ ዲዒንቶ ቤዛፓ ማዔ ዓሶ

1 ካኣቲ ዓርጃክሲሴ ዎደና ባብሎኔ ዓጫፓ ታኣና ዋላ ኬሰኬ ፔቴ ፔቴ ማኣሮ ዓሶኮ ሱኡጎና ዔያቶና ዋላ ፃኣፒንቴ ዓሳ ሃካፓ ሊካ ዓኣ ዓሶሴ፡-

2-14 ፒንሃሴ ቶኦካፓ ጌርሾሜ፡ ዒታማሬ ቶኦካፓ ዳኣኔኤሌ

ዳውቴ ቶኦካፓ ሼካኒያ ናኣዚ ሃፁሼ

ፓርዖሼ ቶኦካፓ ዛካሪያሴ ማዓዛ፤ ዒዛ ማኣሮ ዓሶ ዛላፓ ማዔያ ጄኤታና ደንጊታሚ ማዓ ዓቲንቄ ፃኣፒንቴኔ፤

ፓሃትሞዓኣቤ ቶኦካፓ ዜራሄ ናኣዚ ዔልዬሆናዬ ላምዖ ጄኤታ ዓቲንቄና ዋላ

ዛቲ ቶኦካፓ ያሃዚዔኤሌ ናኣዚ ሼካኒያ ሃይሃ ጄኤታ ዓቲንቄና ዋላ ዓዲኔ ቶኦካፓ ዮናታኣኔ ናኣዚ ዔቤዴ ደንጊታሚ ዓቲንቄና ዋላ

ዔላኣሚ ቶኦካፓ ዓታሊያ ናኣዚ ዩሻዕያ ለንካይታሚ ዓቲንቄና ዋላ

ሼፓጂያ ቶኦካፓ ሚካዔኤሌ ናኣዚ ዛባዲያ ሳሊታሚ ዓቲንቄና ዋላ ዒዮዓቤ ቶኦካፓ ዩሂዔኤሌ ናኣዚ ዓብዲዮ ላምዖ ጄኤታና ታጾ ሳሊ

ዓቲንቄና ዋላ

ባኒ ቶኦካፓ ዮሲፒያ ናኣዚ ሼሎሚቴ ጄኤታና ላሂታሚ ዓቲንቄና ዋላ

ቤባዬ ቶኦካፓ ቤባዬ ናኣዚ ዛካሪያሴ ላማታሚ ሳሊ ዓቲንቄና ዋላ

ዓዘጋኣዴ ቶኦካፓ ሃቃፃኔ ናኣዚ ዮሃናኔ ጄኤታና ታጾ ዓቲንቄና ዋላ

ዓደኒቃሜ ቶኦካፓ ዔሊፔሌፃ፡ ዩዔኤሌንታ ሼማዒያንታ ላሂታሚ ዓቲንቄና ዋላ፤ ዔያታ ጊንፃዲ ማዒ ሙኬኔ።

ቢግዋዬ ቶኦካፓ ዑታዬና ዛኩሬና ለንካይታሚ ዓቲንቄና ዋላ ማዔኔ።

## ዒዘራ ጌኤዢ ማኣሮይዳ ማዳንዳ ሌዊ ዓሶ ዴንቄሢ

15 ታኣኒ ዒማና ዓሃዎ ካታሞ ባንሢ ዎታ ዎሮ ዓጫ ዓሶ ጉቤ ቡኩሴኔ፤ ዒኢካ ሃይሃ ኬሊ ኑዱንኪ ዴዔኔ፤ ዩያ ዓሶ ባኣካ ቄኤሶፓ ዓታዛ ሌዊ ዓሶ ባኣሢ ታ ዔሬኔ፤

16 ዩያሮ ዔሊዔዜሬ፡ ዓሪዔኤሌ፡ ሼማዒያ፡ ዔልናኣታኔ፡ ያሪቤ፡ ዔልናኣታኣኔ፡ ናኣታኣኔ፡ ዛካሪያሴንታ ሜሹላሜ ጌይንታ ታዙጾ

ሱኡጎንሢንታ፤ ዬያጉዲ ሃሣ ዮያሪቤና ዔልናኣታኔ ጌይንታ ላምዖ ዔርዘዘንሢ ዔያቶ ባንሢ ታ ዳኬኔ።

17 ዔያቶ ታኣኒ ካሲፒያይዳ ናንጋ ዳርኮ ሱኡጋሢ ማዔ። ዒደ ባንሢ ዳኪ ዒደና ጌኤዠ ማኣርይዳ ዒዛ ማኣዲ ማዳዘንሢ ጌኤዠ ማኣራ ማዳንዳ ዓሲ ኦም ዔያታ ዳካንዳጉዲ ኬኤዘም ታ ዔርዘኔ።

18 ያኦሲኮ ዳኤፖ ዋልቃ ኦኡና ዋላታሢር ዔያታ ኮሺ ዔራያ ማዔ። ማሂሊ ቶኦኪ ሸሬቢያ ጎዖ ሌዊ ዓሢ ኦም ዳኬኔ፤ ዒዚ ዒማና ዋሊ ዑፃ ታጳ ሳሊ ማዓ ዓቲንቄ ፔኤኮ ናኣቶና ጌርሲንሢና ዔኪ ኦ ኮራ ሙከኔ።

19 ዬያጉዲ ሃሣ ሜራሪ ቶኦካፓ ማዔ ሃሻቢያና ዬሻዒያ ጌይንታ ዓሲ ፓይዳ ላማታሚ ማዓ። ዔያቶኮ ዒጊኖና ዋላ ዔያታ ኦም ዳኬኔ።

20 ቃሲ ሃሣ ዔያቶኮ ቤርታኣ ዓደንሢ ሌዊ ዓሶ ማኣዳንዳጉዲ ካኣቲ ዳውቴና ዒዘኮ ደንዛ ደኦሬ። ሚርጉማ ላምዖ ጄኤታና ላማታሚ ማዓ ዓሲ ጌኤዠ ማኣራ ማዳ ዓሶኬ፤ ዔያታኣ ፔኤኮ ሱንዖና ሱንዖና ፃኣፒንቴኔ።

**ዒዘራ ዳር ሙኡዚ ሃሺ ሺኢቃንዳጉዲ ዓይሣሢ**

21 ያኦሲ ኦ ዓኣዳ ጎይዖ ኮሻንዳጉዲና ኦናንታ ኦ ናኣቶንታም፤ ዬያጉዲ ሃሣ ኦ ባኮ ቢያ ዒ ካፓንዳጉዲ ዒዘኮ ቤርታ ኦ ቶኦኮ ሂርኪዲ ሺኢቃኒ ዒኣካ ዓሃዋ ዋር ዓጫ ሙዖ ሃሺ ሺኢቆ ሺኢጲዖ ሺኢቃንዳጉዲ ታ ዓይሣኔ።

22 ፔቴና ካኣቲ ዓርጃክሲሴም ታ ኬኤዛዖ፡- «ኦ ያኦዛሢ ዒዛ ጉሙርቃዘንሢ ቢያ ዓንጃኔ፤ ዒዛ ሃሻዘንሢዳ ጋዓንቴ ደዲ ሜቶ ዓጋኔ» ጌዔሢር ጎይዖኣ ኦና ሜታሳንዳ ሞርካፓ ካፓንዳጉዲ ፖኦሊሴንታ ፓራሢና ዖላ ዓሲንታ ዒንጎም ካኣቲ ታኣኒ ዖኦጩያታቶ ሄኤዶ ኦ ቦርሲንቴያ ናንዳኔ።

23 ዬያር ያኦሲ ኦና ፔኤር ካፓንዳጉዲ ሙኡዚ ሃሺሢ ዳምቤ ኩንሢ። ሙኡዚ ሃሺ ሺኢቆ ሺኢጲሢሢ ኦ ሺኢቁም ዒዚ ኦ ሺኢጲዖ ዋይዘኔ።

**ጌኤዠ ማኣርም ዒንጎንቴ ባኮ**

24 ዓማና ሱኡጎ ማዔ ቄኤሶንሢ ባኣካፓ ሸሬቢያ። ሃሻቢያንታ ሜሌ ታጳ ዓሲያኣ ታ ደኦሬኔ፤

25 ዬዛፓ ካኣቲንታ ዒዛ ዘራ ዓሶንታ ሃሣ ደንዘንታ፤ ዬያጉዲ ዒኣካ ዓኣ ዒሰራዔኤሌ ዓሳኣ ጌኤዠ ማኣር ማዦም ማዓንዳጉዲ ዒንጌ ቢርንታ ዋርቆንታ ሜሌ ጌኤዠ ማኣርይዳ ማዳንቶ ሜሆዋ ጉቤ ዔሶኮ ዳኤሠሞ ዔር ባኮና ዛጊ ዔሪ ዬንሢ ቄኤሶንሢም ታ ዒንጌኔ።

26-27 ታኣኒ ዒንጌ ጌኤዠ ማኣር ባካ ሃካፓ ዳማ ዓኣ ጎይዖኩ፡-

ለማታሚ ለምፆ ሺያ ኪሎ ማዓ ቢራ  
 ሃይሃ ሺያና ያይዶ ጭታ ኪሎ ማዓ ቢራ ዓንገና ኮሾና ማህ  
 ሃይሃ ሺያና ያይዶ ጭታ ኪሎ ማዓ ዋርቄ  
 ሳሊ ኪሎና ያይዶ ጭታ ገራኣሚና ማዓ ዋርቄና ኮሾንቴ ለማታሚ  
 ዔቴ ሳኣኔ  
 ዋርቆና ኮሾንቴ ዔቶ ሳኣኖና ዋላ ሄኮ ማዔያ ጌኤሺ ሞኦና ዓንገና  
 ኮሾንቴ ለምፆ ዔቴ ሳኣኔ።

28 ዩካፓ ታ ዔያቶም፡- «ዓካሪ ዒንሢ ናንገና ናንጋ ጎዳ ማዔ  
 ዒንሢኮ ቤርታኣ ዓዶንሢ ያኣዛሢም ዲማዴያኬ፤ ዬያጉዲ ሃሃ  
 ዓሳ ፔ ሸኔና ሸኢሸ፡ ዒንገሢ ማዒ ዒንገንቴ ቢሮና ዋርቆናይዳፓ  
 ኮሾንቴ ማሃ ቢያ ዒዛም ዲማዴያኬ።

29 ዬያ ጌኤዠ ማኣሪ ሄላንዳኣና ዛገ ካፑዋቴ፤ ዒኢካ ቄኤሶም  
 ጌይንቴ ቆልፆ ጋራ ሃንሢ ቢያ ዲማዴ ሚሆንሢ ዴኤሡሞ  
 ዔሮ ባኮና ዔሪ ቄኤሶና ሌዊ ዓሶናኮ ሱኡጎና፤ ዬያጉዲ ሃሃ  
 ዬሩሳላሚይዳ ዓኣ ዴሮ ሱኡጎም ዒንጉዋቴ» ጌዔ።

30 ዬያሮ ቄኤሶና ሌዊ ዓሶና ቢሮንታ ዋርቆንታ፤ ሃንጎ ሚሆ፡  
 ያኣሲም ዲማዴሢ ዬሩሳላሚይዳ ጌኤዠ ማኣሪ ጌሃኒ ዔኬኔ።

**ዴሮኮ ዬሩሳላሚ ማዒያ**

31 ኑ ዒማና ዓሃዋ ዋሮ ዓጫፓ ዔቄ ዬሩሳላሚ ዴንዲያ ዓርቄሢ  
 ቤርታሳ ዓገና ጭኤሬ ታጳ ዶንጋሳ ኬሎናኬ፤ ኑ ዓኣዳ ዋዶና ኑ ያኣዛሢ  
 ኑኡና ዋላታሢሮ ካቲ ዴዒ ኑና ያላ ዓሶይዳፓ ዒ ኑና ካፔ።

32 ዩካፓ ዬሩሳላሚ ኑ ሄላፆ ዒኢካ ሃይሃ ኬሊ ሃውሺ ኑ ዴዔ፤

33 ያይዳሳ ኬሎና ጌኤዠ ማኣሪ ኑ ዴንዴ፤ ዒማና ዬያ ቢሮንታ  
 ዋርቆንታ ዲማዴ ሚሆ ቢያ ዴኤሡሞ ዔሮ ባኮና ዛገ ዑሪያ ናኣዚ፡  
 ቄኤ ሳሢ ሚሬሞቴም ኑ ዒንጌ፤ ዒማና ፒንሃሴ ናኣዚ፡ ዔልዓዛሬና  
 ዬያጉዲ ሃሃ ዮዛባዴ ጌይንታ ዒያሱ ናኣዚና ፍዓዲያ ጌይንታ ቢኑዬ  
 ናኣዚያኣ ዒዛና ዋላ ዓኣኔ።

34 ቢያ ባካ ዒማ ኬሎና ፓይዲንቲ ዴኤሡሞ ዔሮ ባኮናኣ ዛገንቲ  
 ዔርቲ ፒዜ ማዔ ጎይሢና ያኣፒንቴ።

35 ዩካፓ ዬያታ ዲዒንቴ ቤዛፓ ማዔ ዴራ ቢያ ዒሰራዔኤሌ  
 ያኣዛሢም ሚቺ ዒንጎ ዒንገሢ ማዓ ባኣዚ ቢያ ዔኪ ሙኬ፤  
 ዬያይዲ ዒሰራዔኤሌ ዴሮ ጉቤሢ ሱንያና ታጳ ለምፆ ዚያ ጌማይ፡  
 ታዘጲታሚ ላሆ ዓዴ ማራይና ላንካይታሚ ላንካይ ዓዴ ማራይና  
 ሸኢሸ፤ ሃሃ ጎሞ ጌኤሺያ ዛሎኮ ታጳ ለምፆ ኮላይ ሸኢሸ፤ ዬይ  
 ቢያ ናንገና ናንጋ ጎዳም ሚቺ ሸኢሸ ዒንገሢ ማዔ።

36 ካኣቲ ዔያቶም ፃኣፒ ዒንጌ ባኮ ዔፕራዲሴኮ ባባ ጌላ ባንያይዳ ዓኣ ዓጮ ዎይሣ ዓሶና ቢታንታ ዓኣ ዓሶናም ዔያታ ዒንጌኔ፤ ዔያታ ዴሮንታ ፆኦሲ ማኣሮ ማዶንታ ማኣዲ ፔቱሞ ዔርዘኔ።

# 9

## ዓይሁዴቱዎ ላኣሎ ዔኮናሣ ዒዘራ ዔሬሣ

1 ዬይ ባካ ጋፔሰካፓ ዒሰራዔኤሌ ዴሮ ሱኡጎኮ ፔቱ ፔቱ ዓሲ ታ ኮይላ ሙካዎ፡- «ዴሮንታ ቄኤሶንታ ሌዊ ዓሳኣ ዓቱዎዎ ዔያቶኮ ዓሺኖይዳ ዓኣ ዓሞኦኔ፤ ሞዓኣቤንታ ጊብጫንታይዳ ናንጋዘንሣና ዬያጉዲ ሃሣ ካኣናኔ ዓሶንታ ሂኢታ ዓሶንታ ፔርዜ ዓሶንታ ዒያቡሳ ዓሶንታ ዓሞራ ዓሶንታኮ ዒኢቱ ማዳፓ ፔና ዔያታ ካፒባኣሴ፤ ዬያ ማሌ ዓሳ ማዳ ሻኣካ ማዳ ቢያ ዔያታ ማዳ።።

2 ዔያታ ዬያ ዓሶ ቶኦካፓ ፔኤሮ ላኣሊ ዔኪ፥ ሃሣ ዔያቶኮ ናኣቶዎ ዔያቶይዳፓ ዔኪሴኔ፤ ዲማዴ ዜርዎ ማሌ ዓሺኖ ዓጮ ዓሶና ዎላ ዔያታ ሲኢሬኔ፤ ዬያ ጊቱቃይዶ ማዶኮ ቤርታዳ ዓሳ ሱኡጎና ቢታንታ ዓኣ ዓሶናኽ» ጌይ ታኣም ከኤዘኔ።

3 ታኣኒ ዬያ ዎይዛዎ ዲቃቲ፥ ታኣኮ ማኣዓሣንታ ዴኤፖ ኮኦቶዎ ዳርዘኔ፤ ሃሣ ታኣኮ ቶኦኮንታ ቡኤጮ ጋፓኖዎ ቡኤጪ ሚርጌና ዎዪ ታ ዴዔኔ፤

4 ዒሰራዔኤሌ ፆኦዛሣ ዲዒንታፓ ማዔ ዓሳ ማዴ ጎሞ ዛሎ ከኤዘ ቃኣሎ ዎይዘዘንሣ ቢያ ዒጊቹሞፓ ዔቄያና ዲቃቲ ታ ኮይላ ሙኪ ቡከኔ፤ ታኣኒያ ሳዓ ዒባናኣና ፆኦሲም ዒንጎ ዒንጊፆ ሺኢካ ዎዶ ሄላንዳኣና ሚርጌና ዎዪ ዲቃቲ ፔኤቄኔ፤

5 ዬይ ዒባናኣና ፆኦሲም ዒንጎ ባኮ ሺኢሾ ዎዳ ሄላዛ ታኣኒ ዎዪ ዴዔ ቤዛፓ ዔቄኔ፤ ታኣኮ ታ ዳርዘ ማኣዓሣያ ማይንቲ፥ ጉኡዠና ጉሞዓቲ ናንጊና ናንጋ ጎዳ ማዔ ታ ፆኦዛሣ ባንሣ ኩጮ ዔቄሳዎ ሂዚ ጌይ ታ ሺኢቄኔ፡-

6 «ታ ፆኦዛሣዎ! ኦኡኮ ጎማ ኦኡፓ ዑሣ ዓኣዴሣሮና ኦኡኮ ዳቢንታ ጫሪንጮ ሄሌሣሮ ታ ዓኣፖ ካሮ ሌካ ታ ፆኦዛሣ፥ ኔ ባንሣ ማሃኒ ታና ቦርሳኔ፤ ሃሣ ታ ዒጊጫኔ።።

7 ኦኡኮ ቤርታኣ ዓዶንሣፓ ዓርቃዎ ሙኪ ሃኖ ሄላንዳኣና ኦኡኒ ኔኡኮ ዴራ ዴኤፒ ዳቢንቲ ማዴኔ፤ ኦኡኮ ጎሞ ሚርጌሞፓ ዔቄያና ኦና ኔ ዴሮንታ ካኣቶንታ ቄኤሶንታ ማሌ ዓጮ ካኣቶ ኩጫ ኦ ሎኦማኔ፤ ዬያሮ ኦኡኒ ጨንቾ ዓፓሮና ሃይቄኔ፥ ኦኡኮ ቆላኣ ቡሪንቲኔ፤ ሃሣ ቱኡቲ ኦ ዲዒንቲያ ዔውቴኔ፤ ሃኣዛጌ፥ ሃሣ ኦ ዓኣ ጎይዎ ጋፒንሣ ሄላንዳኣና ዳውሲንቲኔ።።

8 ናንገና ናንጋ ጎዳ ማዕኔ ኮ ያኦዛሂዮ! ዓኣፖ ኦኡኮ ኔ ቡሌኔ፤ ሃሂ ደካ ዎዴም ኔ ቤርታ ኦ ቦንቸንጉቲ ዴንቁ፥ ኦ ጊዳፓ ዛላ ዓሲ ዓይሉሞ ቃምባራፓ ከሰኪ ሃኖ ዲማዴ ዓጩሎይዳ ኮሺና ናንጋዳጉዲ ኔ ማሄኔ፤ ዎዚ ኦ ዓይሌ ማዕኔያ ዓኪ፥ ላኣሚንጉቲ ናንገ ኔ ኦም ዒንጌኔ።

9 ኦኡኒ ዓይሌኬ፤ ጋዓንቴ ዓይሌ ማዕ ዒኢካ ዓታንዳጉዲ ኔ ኮዒባኣሴ፤ ኔኤኒ ፓርሴ ካኣታ ኦም ሚጨንታንዳጉዲና ኦ ናንጋ ዓይላታፓ ከሰኪ ሚና ቤርታ ሻሂንቴ ኔኤኮ ጌኤዮ ማኣሮ ጊንሣ ላሚ ኦ ማዮንዳጉዲ፥ ሃሃ ሃይካ ዪሁዳና ዬሩሳላሚናይዳ ኮሺና ኦ ናንጋንዳጉዲ ኔ ማሄኔ።

10 «ጋዓንቴ ኦ ያኦዛሂዮ! ሃኖ ሃላንዳኣና ማዕ ባኮሮ ቢያ ኦ ዎዚ ጋዓንዳይ? ሃሂያ ኦ ኔኤኮ ዓይሂያ ላሚ ዎይዞ ዒፄኔ፤

11 ዬንሂ ዓይሂያንሂያ ኔኤኮ ማዴ ማዳ፥ ኔ ማሊያ ከኤዛዘንሂ ዛሎና ከኤዚንቴዘንሂኬ፤ ኔ ማሊያ ከኤዛዘንሂ ሃያኮ ቤርታ፡-ዒንሂ ጌሊ ደካላንዳ ዓጩላ ዒኢቴ ባካፓ ቢያ ጌኤሺቱዋሴ፤ ዎይቲ ጌዔቴ ዒኢካ ናንጋ ዴራ ዓይያፓ ጋፖ ሃላንዳኣና ሻኣካ ማዴና ቢያ ዓጩሎ ኩንሂኔ።

12 ዬያሮ ዒንሂኮ ወዲሮ ናኣቶ ዔያቶኮ ዓቲንቆ ናኣቶም ዒንጊፖቴ፤ ጊንሣ ዒንሂኮ ዓቲንቆ ናኣቶ ዔያቶኮ ወዲሮ ናኣቶ ዔኪሲፖቴ፤ ዓይን ዎዴናኣ ማዎም ዓጩሎይዳፓ ኮሺ ባኣዚ ዒንሂ ሙዒ፥ ዒንሂኮ ናኣቶም ናንገና ማዓ ቤሲ ማሂ ደካልሳኒ ዓይጎ ዎዴናኣ ዔያቶና ዎላ ጊኢጊ ጫኣቂፖቴ፤ ጌይ ኦም ከኤዘኔ።

13 ኦና ሄሌ ሜታሂ ኦኡኮ ፑርቶ ማዴና ኦ ደቢንቶና ዛላናኬ፤ ጋዓንቴ ኔኤኒ፥ ኦ ያኦዛሂ ኦና ሜታሴ ሜታ ኦ ዔካኒ ኮይሳሂፓ ደካኬ፤ ዬያ ሌሊቱዋንቴ ባይሲንታፓ ኦ ቶሊ ሺምፔና ኦ ናንጋንዳጉዲ ኔ ማሄሂ ኦ ዔራኔ።

14 ዓካሪ ዎዲ ጊንሣ ኦኔ ዓይሂያ ሃሺ ሃንሂ ዎይዞ ዒፃ ዴርንሂና ዎሊ ኦ ዔኮንዳይ? ኦኡኒ ዬያ ማዴቶ ኔ ደጋዲ ጋፒንሂ ሃላንዳኣና ኦና ኔ ባይዘንዳኔ፤ ፔቲ ዓሲታዎ ሺምፔና ኔ ዓይሳካኔ።

15 ናንገና ናንጋ ጎዳ ማዕኔ ዒሰራዔኤሌ ያኦዛሂዮ! ኔኤኒ ጎኦምና ዎጋያኬ፤ ጋዓንቴ ባይሲንታፓ ኦ ቶሊ ሺምፔና ዓታንዳጉዲ ኔ ማሄኔ፤ ዓካሪ ኦኡኒ ኦኡኮ ጎም ኔ ቤርታ ቡኡፃኔ፤ ኦኡኒ ኔ ቤርቶ ሺኢካኒ ደንዳዓ ዓሲቱዋሴ።»

# 10

9:12 ከሲ. ማፃ 34:11-16፤ ላሚ. ዎማ 7:1-5።

ሜሌ ዓሰና ዋሊ ዔኩዋጉዲ ላኣጋኒ ኬሲንቴ ዎጌ

1 ዒዘራ ጌኤዠ ማኣሮኮ ቤርቶ ዛላ ጾኦሲ ሸኢቃኒ ጉምዓታዎ ዩኤከ ዩኤከ ማዲንቴ ጎሞ ቢያ ጾኦሲም ቡኡፃ ዎዶና ዓቲንቆንታ ላኣሎንታ ናኣታኣ ዓቲዋዎ ፓይዲ ሚርጌ ማዔ ዒሰራዔኤሌ ዓሲ ፔቲሞና ዒዛ ኮይላ ሙኪ ቡኪ ዒኔ ማቂ ዩኤካኔ።

2 ዒማና ዔላኣሜ ቶኦካፓ ዩሂዔኤሌ ናኣዚ ሸካኒያ ዒዘራም፡- «ጎኔና ኰኡኒ ኑ ዓሸናይዲ ዓኣ ሜሌ ዓሰይዲፓ ላኣሎ ዔኪያና ጾኦሲዲ ኰኡኮ ዓኣ ጉሙርቁንቲዎ ኑ ፓጩሴኔ፤ ዩይ ቢያ ማዔቴያ ሃሂ ዒሰራዔኤሌ ዓሰም ሃጊ ማዓንዲ ዎዛ ዓኣኔ።

3 ሃሂ ዩንሂ ሜሌ ዓሰይዲፓ ኑ ዔኬ ላኣሎ ዔያቶኮ ናኣቶና ዎላ ዓንጃንዲያ ኑና ኮይሳሂ ኑ ጾኦካሂም ኑ ጩኣቆም፤ ኔናንታ ኑ ጾኦካሂኮ ዎጎ ቦንቻ ሜሌ ዓሰንታ ኑና ዘራ ዘር ቢያ ኑ ማዲ ኩንሃንዲኔ፤ ሃሃ ጾኦሲኮ ዎጋኣ ዓይሃሂ ቢያ ኑ ማዲ ኩንሃንዲኔ፤

4 ዩያ ቢያ ማዲሲ ኑና ኩንሂሳንዲሂ ኔናታሂር ዔቄ፤ ኰኡኒ ኔና ማኣዲንዲኔ፤ ዒጊጩፖ፣ ዶዴ» ጌዔኔ።

5 ዩያር ዒዘራ ቄኤሶንታ ሌዊ ዓሰንታ ሃሃ ዴርኮ ሱኡጋ ዩይ ሸካኒያ ሸኢሸ ማሊያ ዔኬያ ማዒያ ጩኣቄሴሰካፓ ማዶ ዓርቄኔ።

6 ዩካፓ ዒዘራ ጌኤዠ ማኣሮኮ ቤርቶ ዛላ ዓኣ ቤዛፓ ዔቂ ዔሊያሺቤ ናኣዚ ዮሃናኔ ናንጋ ቆልጾንሂ ጋር ጌሌኔ፤ ዲዒንቴዘንሂ ጉሙርቁንቲዎ ፓጩሲሂና ማዶ ዳቢንቶና ቢያ ዒ ዎዶ ዎዶ ዩና ዎንቶ ዒኢካ ዎርቄ፤፤ ዒማና ዒ ካሃንታ ዎኣሂያ ካኣሚባኣሴ።

7 ዲዒንቶይዲፓ ማዔዘንሂ ቢያ ዩሩሳላሜይዳ ቡኪንታንዲጉዲ ዩሩሳላሜና ዪሁዳ ዓጮናይዳ ቢያ ኬኤዘንቴኔ።

8 ዩይ ቢያ ዴር ሱኡጋ ዘራ ዘርና ዓይሂያና ማዲንቴያኬ፤ ሃይሃ ኬሊዲ ዩያ ቡኪንቶ ሙካኒ ዲንዲዒባኣ ዓይጎ ዓሲያ ዓኣቶ ዒዛኮ ዓኣ ባካ ቢያ ዓርቁንቲ ዔውታንዲጉዲና ዲዒንታፓ ማዔ ዓሰኮ ፔቲማፓ ኬሰካንዲጉዲ ኬኤዘንቴኔ።

9 ዩይ ዔኤሊያ ዲኪንቴሂዲፓ ሃይሃ ኬሊዲ ዪሁዳና ቢኢኒያሜ ዓጮናይዳ ናንጋ ዓሳ ቢያ ታዘጳሳ ዓጊና ጌኤሬ ላማታማሶ ዓቦና ዩሩሳላሜ ሙኪ ጌኤዠ ማኣሮኮ ዓሳ ቡካ ጰኣካ ቡኪንቴኔ፤ ዒማና ኮሺ ፑኡፒ ዒርዚ ዎርቃኔ፤ ያዲታቶዎ ቡኪንቴላ ኮሺ ኮይሳያታሂር ፔቴ ፔቴ ዓሳ ጨኢኮና ጎጋይቂ ጎጋይቂ ዎይዛኔ።

10 ቄኤሳሂ ዒዘራ ዔቃዎ፡- «ዒንሂ ዒንሂኮ ጉሙርቁንቲዎ ፓጩሲ ጰዴኔ፤ ሜሌ ዓሰይዲፓ ላኣሎ ዒንሂ ዔኬሂር ዒሰራዔኤሌይዳ ዳቢንቲኮ ጋሌ ዒንሂ ዔኪ ዩዔኔ።

11 ዓካሪ ሃካፓ ሴካ ናንጊና ናንጋ ጎዳ ማዔ ዒንሂኮ ቤርታኣ ዓዶንሂ ጾኦካሂ ቤርታ ዒንሂኮ ጎሞ ቢያ ቡኡፀዎቴ፤ ዒዛ ዎዛሳ

ባኣዚ ቢያ ማዲዎቲ፤ ኑ ዓጮይዳ ናንጋ ማሌ ዓሶይዳፓ ቢያ ዲማዲዎቲ፤ ዒንሢ ዔኬ፥ ማሌ ዓሶ ማዔ ላኣሎ ከሱዎቲ» ጌዔ።

12 ዬያር ዬይ ቡኪንቴ ዓሳ ደግ ጌዔ ዑኡሲና፡- «ኔኤኒ ጋዓ ባከ ቢያ ኑኡኒ ማዲንዳ፤!» ጌዔ።

13 ለሚ ሃሃ ኬኤዘያ፡- «ሃሢ ሃይካ ቡኬ ዴራ ማርጌኬ፤ ዬያይዳ ሃሢ ዴኤፒ ዒርዚያ ዋርቂ ዋርቂኬ፤ ሃይካ ማኣሪባኣ ቤሰካ ዔቃኒ ኑ ዳንዳዒባኣሴ፤ ዬያ ጎሞና ቱርጲንቴ ዓሳ ኑ ማርጌታሢር ሃያ ባከ ቢያ ፔቲና ላምዖ ኬለናይዳ ማዲ ጋፒሳኒ ኑም ዳንዳዒንቴዋሴ።

14 ዬያር ኑኡከ ሱኡጋ ሃይካ ዬሩሳላሚይዳ ዬኖ ጌኤዘሎ ኮሺ ዛጊ ጌሰቶንጎ፤ ዬካፓ ማሌ ዓሶ ማዔ ላኣሎ ዔኬ ዓሶ ቢያ ፔቲ ፔቲሢም ዓይሢንታ ከሎማና ዒ ናንጋ ካታሞ ሱኡጎና ዋጎዎጋ ዓሶና ዋላ ሙኪ ሙኪ ፔጊዳ ዓሳና ባከ ዔኮንጎ፤ ዖኦሲ ዳጋዴ ባከ ዛሎ ኑ ዬያይዳቴ ጎሪንታ ሺማንዳ፤» ጌዔ።

15 ዬይ ከኤዚንቴ ዎደና ማሹላማና ለዊዓሢ ሻቤታዬና ዔያቶኮ ማሊያ ቃራኬ ጌዔ፥ ዓሳሄሌ ናኣዚ ዮናታኣኔና ቲቂዋ ናኣዚ ያህዜያፓ ዓታዛ ማሌ ዒዳ ማኬ ዓሲ ባኣሴ።

16 ዲዒንታፓ ማዔ ዓሳ ቢያ ዬኖ ማሊዳሎና ዔኤዒ ጊኢጌ፤ ዬያር ቂኤሳሢ፤ ዒዘራ ቶኦኮ ቶኦኮኮ ሱኡጎ ባኣካፓ ከሲ ማዲሻንዳ ዓሲ ደኦሪ ሱንዖ ዋሊ ሄሊሲ ያኣፒ ጌሢ፤ ዔያታ ታጳጎ ዓጊና ያኤሬ፥ ቤርታሳ ዓሶና ማሌ ላኣሎ ዔኬ ዓሶ ሃይሶ ጌሰቲሢ ሳርቂ።

17 ዬካፓ ሄሊሴ ዓጊኖኮ ቤርታሳ ከሎ ማሌ ላኣሎ ዔኬ ዓሶ ሃይሶ ጌሰቲ ጋፒሴ።

**ማሌ ዓሶ ዜርዖፓ ላኣሎ ዔኬ ዓሶ ሱንዖ**

18 ማሌ ዓሶ ዜርዖፓ ላኣሎ ዔኬ ዓሶኮ ሱንዖ ሃካፓ ዴማ ዓኣ ጎይዖኬ፡-

**ፔኤኮ ቶኦኮና ቶኦኮና ያኣፒንቴ ቂኤሶ**

ዒዮዳዳቂ ናኣቶ ማዔ ዒያሱና ዒዛኮ ጌርሲንሢ ቶኦካፓ ከሰኬዘንሢ፡- ማዕሴያ፥ ዔሊዔዜሬ፥ ያሪቤና ጌዳሊያና፤

19 ዔያታ ፔኤኮ ላኣሎ ዓንጂ ዳካኒ ጫኣቂሰካፓ ዔያቶኮ ጎሞ ጌኤሺዖም ማዓ ፔቲ ዓዴ ማራይ ሚቺ ዒንጎ ዒንገሢ ማሂ ሺኢሼ።።

20 ዒሚሬ ቶኦካፓ፡- ሃናኒና ዜባድያና

21 ሃሪሜ ቶኦካፓ፡- ማዕሴያሄ፥ ዔሊያሴ፥ ሹማዒያ፥ ዬሃዔኤሌንታ ዑዚያንታ፤

22 ፓሽሁሬ ቶኦካፓ፡- ዔልዮዔናዬ፥ ማዕሴያ፥ ዒሰማዔኤሌ፥ ናትናዔኤሌ፥ ዮዛባዴና ዔልዓሳና፤

23 ለዊ ዓሶ ያጳፓ፡-

ዮዛባዳ፥ ሺምዒ፥ ቄሊፃ ጌይንታ ቄላያ፥ ፔታህያ፥ ዪሁዳና  
ዔሊዔዜሬና፤

24 ያኦሲ ቦንቾም ዓይኑም ዓይናዳ ዓሶ ፃጳፓ፡-  
ዔሊያሺቤ

**ጌኤዡ ማእሮ ካፓ ዓሶ ፃጳፓ**

ሻሉሜ፥ ጃሌሜና ዑሪና፤

25 ሃንጎ ዒሰራዔኤሌ ዓሶኩ፡-

ፓርያሽ ቶኦካፓ፡- ራሚያ፥ ዪዚያ፥ ማልኪያ፥ ሚያሚኔ፥ ዓላዜሬ፥  
ማልኪያና ቤናያና፤

26 ዔላኦሚ ቶኦካፓ፡- ማታኒያ፥ ዛካሪያሴ፥ ዪሃዔኤሌ፥ ዓብዲ፥  
ዪሬሞቴና ዔሊያና፤

27 ዛቱ ቶኦካፓ፡- ዔልዮዔናዬ፥ ዔሊያሺቤ፥ ማታኒያ፥ ዪሬሞቴ፥  
ዜባዳና ዓዚዛና፤

28 ቤባዬ ቶኦካፓ፡- ዮሆናኔ፥ ሃናኒያ፥ ዛባዬና ዓትላዬና፤

29 ባኒ ቶኦካፓ፡- ሜሹላሜ፥ ማሉኬ፥ ዓዲያ፥ ያሹቤ፥ ሽዓሌና  
ዪሬሞቴና፤

30 ፓሃትሞዓኦ ቶኦካፓ፡- ዓድና፥ ኬላሌ፥ ቤናያ፥ ማዕሴያ፥  
ማታኒያ፥ ቤፃልዔኤሌ፥ ቤኑዬና ሚናኦሴና፤

31-32 ሃሪሜ ቶኦካፓ፡- ዔሊዔዜሬ፥ ዪሺያ፥ ማልኪያ፥ ሽማዒያ፥  
ሲሞኦኔ፥ ቢኢኒያሜ፥ ማሉኬና ሽማሪያና፤

33 ሃሹሜ ቶኦካፓ፡- ማታናዬ፥ ማታታ፥ ዛባዳ፥ ዔሊፔሌፃ፥  
ዪሬሚዬ፥ ሚናኦሴና ሺምዒና፤

34-37 ባኒ ቶኦካፓ፡- ሜዕዳዬ፥ ዓሞራሜ፥ ዑዔኤሌ፥ ቤናያ፥  
ቤድያ፥ ኬሉሂ፥ ዋኒያ፥ ሜሬሞቴ፥ ዔሊያሺቤ፥ ማታኒያ፥ ማትናዬና  
ያዕሱና፤

38-42 ቢኑዬ ቶኦካፓ፡- ሺምዒ፥ ሽሌምያ፥ ናኦታኒ፥ ዓዲያ፥  
ማክናዳባዬ፥ ሽሻዬ፥ ሻራዬ፥ ዓዛርዔኤሌ፥ ሽሌሚያ፥ ሽማሪያ፥  
ሻሉሜ፥ ዓማሪያና ዮሴፔና፤

43 ኔሶ ቶኦካፓ፡- ዪዒዔኤሌ፥ ማቲቴያ፥ ዛባዳ፥ ዜቢና፥ ያዳዬ፥  
ዒደዔኤሌና ቤናያና፤

44 ዪይ ዓሳ ቢያሜሌ ፃጳፓ ላኦኤ ዔኬ ዓሶኬ፤ ዔያታ ዔኬ ሜሌ  
ፃጳ ላኦኤ ቢያ ዓንጂ ዔያቶሶ ናኦቶና ዋላ ዳኬኔ።



**ጌሌዢ ማጻሕፍት**  
**The Holy Bible in the Maale language of Ethiopia,**  
**using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

**ጌሌዢ ማጻሕፍት**

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929